

文苑

兩浙名賢錄

二十三



兩浙名賢錄卷四十五目次

文苑

漢

嚴夫子忌

嚴侍中助

三國吳

武陵太守謝偉平承

子崇最附

朱侍中育

鄱陽太守虞翔

任奕附

晉

尚書郎褚季雅陶

相國參軍陸士衡機



右司馬陸士龍雲

軍容祭酒孫德施惠

散騎常侍陸恭仲喜

子育附

散騎常侍于令升寶

宋齊梁陳

謝康樂靈運

子鳳附

法曹行參軍謝惠連

吳郡太守王休泰韶之

征北諮議參軍謝超宗

尚書吏部郎謝玄暉朧

中書令謝希逸莊

吏部尚書謝景滌覽

弟舉附

尚書左丞謝玄度微

宋處深廣之

散騎常侍孔德璋稚珪

丘祭酒靈鞠

子遲附

尚書僕射沈休文約

孫衆附

吳叔庠均

太子中舍人陸佐公倓

三子附

丘令楷

御史中丞沈初明炯

陸韓卿厥

虞炎附

東曹掾孔道

黃門侍郎陸子龍雲公

黃門侍郎顧希馮野王

吏部尚書陸伯玉瓊

子從典附

散騎常侍陸溫玉琰

弟瑜附

隋

秘書丞姚伯審察

秘書學士顧仲文彪

魯世達附

秘書學士虞士裕綽

唐



弘文館學士姚思廉

東宮學士賀德仁

兄德基附

散騎常侍褚希明亮

曾祖湮父玠附

西臺舍人徐將道齊聃

子附

內史舍人孔紹安

子禎孫季詡萬壽附

溧陽尉孟東野郊

監察御史吳少微

子鞏附

楊衡

監察御史舒元興

秘書監賀季真知章

子僧子附

殿中侍御史沈下賢亞之工部郎中皇甫持正湜

子附

沈千運

中書舍人徐季海浩

進士施希聖肩吾

徐凝附

著作郎顧逋翁况

子非熊附

著作郎孔惟微至

包進士融

子何信附

散騎常侍馮介夫定

兄宿附

秘書郎錢起

丹徒縣尉項子遷斯

協律郎章八元

子孝標孫碣附

職方員外郎袁還朴不約方雄飛干

戶部侍郎吳子華融

祖翥附

閻士和

工部尚書陸祥文宸

嚴子重憚

和州刺史凌宗一準

給事中羅昭諫隱

子塞翁附

二代

嚴州刺史劉昭禹



兩浙名賢錄卷四十五 目次終

兩浙名賢錄卷之四十五

東海徐象梅仲和氏纂

錢唐陳義適林道氏閱

文苑

漢 共二人

嚴嚴夫子忌 廷言 知 帝 報 舉 賢 貞 樓 梁 百 翁 入

嚴忌本姓莊避明帝諱稱嚴由拳人也忌與司馬相如

俱好辭賦哀屈原受性忠貞不遇明主而遭暗世乃斐

然作辭歎而述之曰哀時命遭景帝不好辭賦無所得



志聞梁孝王右文通賓客乃徒步入梁受知孝王與鄒陽枚乘俱見尊重而忌名尤甚世稱嚴夫子

嚴侍中助

嚴助忌子也。或言族子。武帝時。罷舉賢良對策百餘人。帝善助對。擢中大夫。是時帝務開邊。屢舉賢良文學。令助等與公孫弘辯論中外相應。以義理之文。大臣數詘而助獨親幸。吾丘壽王司馬相如東方朔枚臯不及也。建元三年。閩越圍東甌。詔助持節發兵救之。助風諭南粵。遣其子入侍。又佯論淮南王發兵臨粵。帝益賢助。嘗侍燕從容。上問助居鄉里時。助對曰。家貧爲友。婿富人。所辱。上問所欲。助曰。願爲會稽太守。於是拜會稽太守。數年不聞問。乃賜書曰。君厭承明之廬。勞侍從之事。懷故土。出爲郡吏。會稽東接於海南。近諸越。北枕大江。間者濶焉。久不聞問。具以春秋對。毋以蕪秦縱橫。助恐。上書謝。願奉三年計。最。詔留侍中。後淮南王反。以助嘗受賂遺。帝意薄其罪。御史大夫張湯以爲腹心之臣。而外與諸侯私交。不誅。後不可治。竟論殺之。歸葬。由拳。

三國吳

共六人



武陵太守謝偉平承

子崇最附

謝承字偉平山陰人洽聞強記一覽不忘以女兒爲孫  
權夫人仕吳官至武陵太守撰後漢書百餘卷子崇最  
崇揚威將軍最吳郡太守並知名

朱侍中育

朱育山陰人少好奇字造作異字千名以上仕郡門下  
書佐太守濮陽典正旦宴見掾吏問昔王景典問士於  
虞仲翔而未覩仲翔對也書佐寧識之乎育因舉成論  
開說州治沿革條答詳敏太守稱善育後仕朝嘗在臺

閣爲東觀令加位侍中推刺占射文藝優絕

鄱陽太守虞翔

任奕附

虞翔章安人仕吳爲鄱陽太守與同邑任次龍各馳文  
檄燁若春榮次龍名奕立操清修不染流俗郡將蔣秀  
請爲功曹嘗以秀不奉法苦諫不納謝去久之秀坐事  
被收歎曰任功曹真人也歷官御史中丞咸和三年卒

晉

共七人

尚書郎褚季雅陶

褚陶字季雅錢塘人弱不好弄少而聰慧以墳典自娛



年十三作鷗鳥水碓二賦見者竒之吳平召補尚書郎張華見之謂陸機曰君兄弟龍躍雲津顧彥先鳳鳴朝陽謂東南之寶已盡不意復見褚生機曰公但未覩不鳴不躍者爾華曰故知延陵之德不孤川嶽之寶不賈矣仕至中尉卒

相國叅軍陸士衡機

陸機字士衡海鹽人抗子也少有異才服膺儒術抗卒領父兵爲牙門將年二十而吳滅退居勤學太康末與弟雲入洛造太常張華華重其名如舊相識曰伐吳之

役利獲二僑薦之諸公太傅楊駿辟爲祭酒累遷太子洗馬吳王晏出鎮淮南以機爲郎中令遷尚書中兵郎轉殿中郎趙王倫輔政引爲相國叅軍預誅賈謚功賜爵關中侯成都王穎起兵討長沙王乂假機後將軍河北大都督被譖爲穎所殺機天才秀逸辭藻宏麗張華曰人之爲文恨才少而士衡患其多弟雲曰君苗見兄文輒欲燒其筆研後葛洪稱機文猶玄圃之積玉無非夜光五河之吐流泉源如一其弘麗妍贍英銳飄逸爲一代之絕所著文三百餘篇有集十卷今存詩賦論議



箋表碑誄一百七十餘首

右司馬陸士龍雲

陸雲字士龍六歲能文與兄機齊名號二陸吳尚書廣陵閔鴻奇之曰此兒若非龍駒當是鳳雛年十六入洛刺史周駿召爲從事曰陸士龍今之顏子也補浚儀令有異政稱神明尋拜吳王晏郎中令入爲尚書郎侍御史太子中舍人中書侍郎成都王穎表爲清河內史轉大將軍右司馬與兄機同遇害所著文三百四十九篇新書十篇集凡十卷

軍容祭酒孫德施惠

孫惠字德施富陽人吳豫章太守賁之曾孫口訥好學有才識東海王越舉兵下邳惠乃詭稱南嶽逸士秦秘之以書干越越卽以爲記室參軍專掌文疏預參謀議復補司空從事中郎越誅周穆等夜召參軍王廙造表廙戰懼壞數紙不成時惠不在越歎曰孫中郎在表就久矣越遷太傅以惠爲軍容祭酒每造書檄越或驛馬催之應命立成皆有文采

散騎常侍陸恭仲喜

子育附



陸喜字恭仲，機之從父兄。仕吳，累遷吏部尚書，少有聲名，好學，有才思，嘗爲自序，其略曰：劉向省新語而作新序，桓譚詠新序而作新論，余不自量，感子玄之法言而作言道，觀賈子之美才而作訪論，觀子政洪範而作古今歷覽，蔣子通萬機而作審機，讀幽通思玄四愁而作娛賓九思，真所謂忍媿者也。其書近百篇，吳平，又作西州清論，傳於世，借稱諸葛孔明以行其書也。太康中，下詔曰：偽尚書陸喜者十五人，南士歸稱，並以貞潔，不容皓朝，或忠而獲罪，或退身修志，放在草野，主者可皆隨本位，就下拜除，勅所在以禮發遣，須到隨才授用，乃以喜爲散騎常侍，尋卒。子育爲尚書郎弋陽太守。

散騎常侍于令升寶

于寶字令升，其先新蔡人。祖統，吳奮武將軍都亭侯。父瑩，丹陽丞，徙家海鹽。寶少勤學，博覽書記，以才器召爲著作郎。平杜弢有功，賜爵關內侯。中興草創，未置史官，中書監王導疏薦寶於元帝，於是始領國史。以家貧，求補山陰令，遷始安太守。王導署爲司徒右長史，遷散騎常侍，著晉紀，自宣帝迄於愍帝，五十二年，凡二十卷。奏



之其書簡潔直而能婉咸稱良史性好陰陽術數留意  
 京房夏侯勝等傳撰集古今神祇靈異人物變化名搜  
 神記凡二十卷以示劉惔惔曰卿可謂鬼之董狐又為  
 左氏春秋左氏義外傳註周易周官凡數十篇及雜文  
 集行於世

宋齊梁陳

共三十五人

謝康樂靈運

子鳳附

謝靈運玄之孫也少好學博覽羣書與顏延之並以文  
 章為江左第一襲封康樂公累遷秘書丞坐事免宋受  
 禪降爵為侯為太子左衛率少帝即位出為永嘉太守  
 郡有名山水遂肆意遊遨動踰旬朔尋引疾還始寧修  
 營舊業有終焉之志每有詩一首至都下貴賤莫不競  
 寫宿昔間士庶皆徧名動都下作山居賦并自註以言  
 其事文帝徵為秘書丞不赴命光祿大夫范泰敦趣乃  
 出遷侍中賞遇甚厚靈運詩書皆兼獨絕每文竟手自  
 寫之文帝稱為二寶自以名輩應參時政至是惟以文  
 義見接每侍上宴談賞而已意常怏怏多稱疾不朝出  
 郭遊行經旬不返乃賜假東歸與族弟惠連等東海何



長瑜穎川荀雍太山羊璿之以文章賞會共爲山澤之遊因祖父之資生業甚厚鑿山浚湖功業無已尋山陟嶺必造幽峻岩障數十重莫不備盡登躡常着木屐上山則去其前齒下山去其後齒嘗自始寧南山伐木開徑至臨海從者數百臨海太守大駭以爲山賊知是靈運乃安始寧有休嶁湖靈運求以爲田太守孟顗固執不與遂成怨隙表其異志靈運詣關自陳帝不罪更以爲臨川內史在郡遊放不異永嘉爲有司所糾靈運與兵逃逸作詩曰韓亡子房奮秦帝魯連耻追討擒之上愛其才乃降死一等徙廣州或告其買兵器結健兒詔於廣州奔市年四十九靈運恃才放逸多所凌忽故及於禍子鳳元嘉中爲奉化令有惠政民祀之

法曹行參軍謝惠連

謝惠連會稽太守方明之子十歲能屬文族兄靈運嘉賞之云每有篇章對惠連輒得佳語嘗於永嘉西堂思詩竟日不就忽夢見惠連卽得池塘生春草大以爲工嘗云此語有神助非吾語也本州辟主簿不就元嘉七年始爲司徒彭城王義康法曹行參軍義康修東府城



城塹中得古塚爲之改葬使惠連爲祭文留信待成其  
文甚美又爲雪賦以高麗見奇靈運見其新文每日張  
華復生不能易也年三十七卒

吳郡太守王休泰詔之

父偉之子曄附

王韶之字休泰郎中令偉之之子偉之少有志當世泰  
元隆安時事大小悉爲撰錄韶之少孤家貧好學嘗三  
日絕糧而執卷不輟爲文善敘事有良史才除著作佐  
郎宋武帝以其博學有文辭補通直郎領西省出爲吳  
郡太守得父舊書私撰晉安帝春秋叙王珣貨殖王厥  
作亂珣子弘適領揚州刺史韶之在郡常慮爲弘所繩  
夙夜勤勵稱爲良守有孝傳三卷及文集行於世宋廟  
歌辭韶之所作也子曄位臨賀太守

征北諮議參軍謝超宗

謝超宗鳳之子隨父嶺南元嘉末得還與慧休道人來  
姓謝學有文辭盛得名譽選爲新安王子鸞國常侍王  
母殷淑儀卒超宗作誄奏之帝大嗟賞謂謝莊曰超宗  
殊有鳳毛泰始中爲尚書殿中郎齊高帝爲領軍愛其  
才以爲義典太守坐公事免詣東府門自通其日風寒



高帝謂四坐曰。此客至。使人不衣自暖。及齊受禪。爲黃門郎。有司奏撰郊廟歌。上勅司徒褚彥回等。作者凡十人。超宗辭獨見用。爲人恃才。使酒多所凌忽。出爲南郡王中軍司馬。坐怨望免官。武帝卽位。使掌國史。除竟陵王征北諮議。領記室。愈不得志。超宗爲子娶張敬兒女。爲婦。帝甚疑之。及敬兒誅。超宗謂丹陽尹李安人曰。往年殺韓信。今年殺彭越。君欲何計。安人具啓之。帝遂下超宗廷尉。一宿髮白。皓首詔徙越嶲。行至豫章。賜死。子幾卿自有傳。

尚書吏部郎謝玄暉

謝朓字玄暉。正員郎緯之子。吳興太守述之孫也。少好學。有美名。文章清麗。爲齊隨王子隆鎮西功曹。轉文學。子隆在荊州。好辭賦。朓尤被賞。不捨日夕。長史王秀之以朓年少。相勸欲以啓聞。朓知之。因事求還。仍除新安王中軍記室。朓箋辭子隆。時荊州信去。倚待朓執筆。便成文。無點易。以本官兼尚書殿中郎。明帝輔政。以爲驃騎諮議。領記室。掌霸府文筆。又掌中書詔誥。轉中書郎。出爲晉安王鎮北諮議。南東海太守。行南徐州事。未幾。



遷尚書吏部郎。朓上表三讓，優答不許。朓善草隸，長五言詩。沈約常云：「二百年來無此詩也。」敬皇后遷附山，朓撰哀策文。齊世莫有及者。東昏失德，江祏欲立江夏王寶玄，未更回惑，欲更立始安。朓議不合，輒為祏構而害之。詔暴其過惡，收付廷尉。又使御史中丞范岫奏收朓下獄，死。時年三十六。朓好獎人才，會稽孔顛粗有才，筆未為時知。孔珪嘗令草讓表，以示朓。朓嗟吟良久，手自折簡寫之。謂珪曰：「士子聲名未立，應共獎成，無惜齒牙。餘論其好善如此。」

中書令謝希逸莊

謝莊字希逸，侍中弘微之子。七歲能屬文。及長，韶令美容儀。宋文帝見而異之，謂尚書僕射殷景文曰：「藍田生玉，豈虛也哉。」為隨王誕後軍諮議，領記室。分左氏經傳，隨國立篇，製木方丈圖山川土地，各有分理。離之則州郡殊別，合之則宇內為一。除太子中庶子。時南平王鐸獻赤鸚鵡，普詔羣臣為賦。太子左衛率袁淑文冠當時，及見莊賦，歎曰：「江東無我，卿當獨秀。我若無卿，亦一時之傑。」元凶弒立，轉司徒左長史。孝武入討，密送檄書與



莊令改正宣布之。莊遣腹心門生具慶奉啓事密詣孝武陳誠。及帝踐祚，除侍中。孝建元年，遷左將軍。莊有口辯，初孝武嘗賜莊寶劍，莊以與豫州刺史魯爽。後爽叛，帝因宴問劍所在，答曰：昔以與魯爽，別竊爲陛下。杜郵之賜，上甚悅。當時以爲知言，拜吏部尚書。坐疾多免官。大明元年起爲都官尚書，遷左衛將軍，加給事中。時河南獻舞馬，詔羣臣爲賦，莊所上甚美。又使莊作舞馬歌，令樂府歌之。遷侍中，領前軍將軍，廢帝卽位，拜金紫光祿大夫。初，孝武寵姬殷貴妃薨，莊爲誄，言贊執堯門，廢帝在東宮，銜之。至是遣人詰莊曰：卿昔作殷貴妃誄，知有東宮，不將誅之。孫奉伯說帝曰：死是人之所同，政復一往之，苦不足爲困。莊少長富貴，且繫之尚方，使知天下苦劇，然後殺之。未晚。帝曰：卿言有理，繫於左尚方。明帝定亂，得出使爲赦詔，莊夜出署門，方坐命酒酌之，已微醉，傳詔立待，詔成，其文甚工。後爲尋陽王師，加中書令，散騎常侍，卒，贈右光祿大夫，謚惠子。所著文章四百餘首，行於世。

吏部尚書謝景滌覽

弟舉附



謝覽字景滌，潘之子。遷尚齊錢唐公主，拜駙馬都尉。梁武帝平建鄴，朝士王亮、王瑩等數人揖，自餘皆拜。覽時年二十餘，爲太子舍人，亦長揖而已。意氣閒雅，視瞻聰明。武帝目送良久，謂徐勉曰：「覺此生芳蘭，竟體想謝莊。」政當如此，自此仍被賞遇。天監元年，爲中書侍郎，嘗侍坐受勅，與侍中王暕爲詩答贈，其文甚工。乃使重作，復合旨。帝賜詩云：「雙文旣後進，二少實名家。豈伊爾棟隆，信乃俱國華。」拜吏部尚書，出爲吳興太守，以蕪潔稱。時人比之王述，卒於官。贈中書令，弟舉字言揚，幼好學，與覽齊名。年十四，嘗贈沈約詩，爲約所賞。初爲太常博士，與兄覽俱預元會。江淹一見，並相欽挹，曰：「所謂御二龍於長途者也。」爲太子家令，掌管記，深爲昭明太子賞接。梁武帝嘗訪舉於覽，覽曰：「識藝過臣，甚遠。惟飲酒不及於臣。」帝大悅。歷遷吏部尚書。太清二年，遷尚書令，卒於內臺。贈侍中、衛將軍、開府儀同三司，舉託情玄勝，尤長佛理。注淨名經，常自講說，有文集二十卷。

尚書左丞謝玄度微

謝微字玄度，景仁之子。美風采，好學，善屬文。位兼中書



舍人時魏中山王元略還北梁武帝餞於武德殿賦詩三十韻限三刻成微二刻便就文甚美帝再覽焉又爲臨汝侯製放生文亦見賞於世除尚書左丞及昭明太子薨帝立晉安王綱爲皇太子將出詔唯召尚書右僕射何敬容宣惠將軍孔休源及微三人與議微時年位尚輕而任遇已重後卒於北中豫章王長史南蘭陵太守文集二十卷

宋處深廣之

宋廣之字處深錢唐人喜清談初顧懽著三名論以正四本之失時賢並立論難而廣之獨爲精詰

散騎常侍孔德璋稚珪

孔稚珪字德璋山陰人少多學涉工文辭時周顒隱鍾山已而復仕稚珪作北山移文譏之齊高帝爲驃騎召爲記室與江淹對掌辭筆歷御史中丞建武初爲南郡太守以魏連歲南侵百姓死傷乃上書陳通和之策稚珪風韻清疎好文詠飲酒七八斗不樂世務居室盛營山水憑几獨酌傍無雜事門庭之內草萊不剪中有蛙鳴或問之稚珪曰我以此當兩部鼓吹王晏嘗鳴鼓吹



候之聞羣蛙鳴曰此殊聒人耳稚珪曰我聽鼓吹殆不及此晏有慙色永元元年爲都官尚書遷太子詹事加散騎常侍卒贈金紫光祿大夫

丘祭酒靈鞠

子遲附

丘靈鞠吳興烏程人也少好學善屬文州辟從事詣領軍沈演之演之曰身昔爲州職詣領軍謝晦賓主坐處政如今日卿將來復如此也累遷員外郎齊高帝使靈鞠參掌詔勅建元元年轉中書郎勅知東官手筆嘗還東詣司徒褚彥回別彥回不起曰比脚疾更增不復能

起靈鞠曰脚疾亦是大事公爲一代鼎臣不可復爲覆餗其強切如此武帝卽位爲通直常侍尋領東觀祭酒靈鞠曰人居官願數遷使我終身爲祭酒不恨也靈鞠好飲酒臧否人物在沈涂坐見王儉詩涂曰王令文章大進靈鞠曰何如我未進時靈鞠在宋時文名甚盛入齊頗減蓬髮弛縱無形儀不事家業王儉謂人曰丘公仕宦不進才亦退矣位長沙王車騎長史卒著江左文章錄序起大典訖元熙文集行於時子遲字希範八歲便屬文靈鞠常謂氣骨似我在齊以秀才遷殿中郎梁



武帝平鄴，引爲驃騎主簿，甚被禮遇。時勸進梁王，及殊禮，皆遲文也。及踐祚，遷中書郎，待詔文德殿。時帝著連珠詔，羣臣繼作者數十人，遲文最美。出爲永嘉太守，至任下教曰：貴郡控戴山海，利兼水陸，實東南之沃壤，一都之巨會，而曝背拘牛，屢空於畎畝；績麻治絲，無聞于寔巷；其有畊灌不修，桑榆靡樹，遨遊塵里，酣醕卒歲，才異相如，而四壁徒立，高慙仲蔚，而三徑没人，是非盛世之民，名都之俗，革其舊習，務其本業，維新化理，安育老稚。雖謝文翁之正俗，庶幾龔遂之遺風，竟以不稱職爲有司所糾。帝愛其才，寢其奏。天監四年，爲臨川王宏諮議參軍。北伐魏時，陳伯之在北，與魏軍來拒，遲以書喻之。伯之遂降，還拜中書侍郎，卒。遲辭采艷逸，鍾嶸評之云：范雲婉轉清便，如流風回雪；遲點綴映媚，似落花依草。其見稱如此。

尚書僕射沈休文約

孫衆附

沈約字休文，吳興武康人。少篤志好學，晝夜不釋卷，博通羣籍，善屬文。濟陰蔡典宗爲郢州時，引爲安西外兵參軍，兼記室。及爲荊州，典宗嘗謂其諸子曰：沈記室人



倫師表宜善師之。又辟爲征西記室。事齊文惠太子。爲步兵校尉。直永壽省。校四部圖書。特被親遇。每旦入見。景斜方出。竟陵王秉政。約以文學見親。與范雲等號稱八友。梁武帝在西邸。與約遊。建康平。引爲司馬。及受禪。拜尚書僕射。封建昌縣侯。約性不飲酒。少嗜欲。雖特遇隆重。而居處儉素。立宅東田。瞻望郊阜。嘗爲郊居賦。以叙其事。久之。加侍中。特進。遷中軍將軍。丹陽尹。天監十二年。卒於官。謚曰隱。約左目重瞳子。腰有紫志。聰明過人。好墳典。聚書至二萬餘卷。都下無比。歷仕三代。該悉舊章。博物洽聞。當世取則。謝玄暉善爲詩。任彥昇工於筆。約兼而有之。然不能過也。自負高才。昧於榮利。乘時射勢。頗累清談。及居端揆。稍弘止足。每進一官。輒殷勤請退。而終不能去。論者比之山濤。所著晉書一百卷。宋書齊紀梁武紀若干卷。又撰邇言十卷。文章志三十卷。文集一百卷。行於世。又撰四聲韻譜。自謂在昔詞人。累千載不悟。而獨得曾襟。窮其妙旨。自謂入神之作。武帝嘗問曰。何謂四聲。約曰。天子聖哲。孫衆字仲興。好學。頗有文辭。事梁爲太子舍人。時武帝製千文詩。衆爲之註。



解與陳郡謝景同時召見文德殿帝令衆作竹賦賦成  
奏之手勅答曰卿文體翩翩可謂無忝爾祖累遷太子  
中書舍人兼散騎常侍陳武帝受命位中書令帝以衆  
州里知名甚敬重之賞賜超於時輩尋得罪賜死

### 吳叔庠均

吳均字叔庠吳郡故鄣人也家世寒賤至均好學有俊  
才沈約嘗見均文頗相稱賞梁天監初柳惲爲吳興召  
補主簿日引與賦詩均文體清拔有古氣一時文士多  
效之號吳均體惲薦之武帝卽日召入賦詩稱旨待詔  
著作使撰史通始三皇迄齊代均草本紀世家已畢性  
列傳未就卒均所著後漢書齊春秋又作十二州記錢  
唐先賢傳續文釋各若干卷

### 太子中舍人陸佐公倕

子續緬附

陸倕字佐公南兖州刺史慧曉之季子也少勤學善屬  
文於宅內起兩茅屋杜絕往來晝夜讀書者數歲所讀  
一遍必誦於口嘗借人漢書失五行志四卷乃暗寫還  
之略無遺脫十七舉本州秀才天監初爲右軍安成王  
主簿與樂安任昉友爲感知已賦以贈昉昉因此名以



報之及昉爲中丞簪裾輻輳預其燕者殷芸到漑劉苞  
劉孺劉顥劉孝綽及倕而已號曰龍門之遊梁武帝雅  
愛倕才乃勅撰新漏刻銘其文甚美又詔爲石闕銘勅  
褒美之賜絹三十匹累遷太常卿卒子績早慧七歲通  
經爲童子郎卒次緬貌酷似倕一看殆不能別

丘令楷

丘令楷吳興人工詩嘗與齊蕭文琰濟陽江洪餘姚虞  
羲共打銅鉢響滅卽詩成皆可觀竟陵王子良甚稱其  
才以爲敏妙絕於一時

御史中丞沈初明炯

沈炯字初明吳興武康人少有俊才爲當時所重仕梁  
爲吳令侯景之難吳郡太守袁君正入援建業以炯監  
郡臺城陷景將宋子仙據吳興使召炯委以書記炯辭  
以疾子仙怒命斬之炯解衣就戮或救之得免于仙敗  
王僧辯素聞其名購得之自是羽檄軍書皆出於炯及  
簡文遇害四方岳牧上表勸進僧辯令炯製表當時莫  
有逮者陳武帝南下與僧辯會白茅灣登壇設盟炯爲  
其文景平特封原鄉侯拜給事黃門侍郎領尚書左丞



魏尅荆州被虜甚見禮遇授儀同三司以母在東恒思歸國恐以文才被留閉門却掃無所交接時有文章隨卽棄毀不令流布爲表陳情乞還曰臣聞橋山雖掩鼎湖之竈可祠有魯遂荒大庭之跡無泯伏惟陛下德漪蘭纂靈豐谷漢道旣登神仙可望射之果於海浦禮日觀而稱功橫中流於汾河指栢梁而高宴何其甚樂豈不然與旣而運屬上仙道窮宴駕甲帳珠簾一朝零落茂陵玉盃遂出人間陵雲故基與原田而騰騰別風餘迹帶陵阜而茫茫羈旅縲臣豈不落淚昔承明見厭嚴助東歸駟馬可乘長卿西返恭聞故實竊有愚心黍稷非馨敢望徼福但雀臺之弔空愴魏君雍丘之祠未光夏后瞻仰烟霞伏增悽戀未幾放還歷司農卿御史中丞陳武帝受禪加通直散騎常侍軍國大政多預謀謨卒贈侍中謚恭子有集二十卷行世

陸韓卿厥

虞炎附

陸厥字韓卿揚州別駕閑之子也少有風槩善屬文州舉秀才時盛爲文章吳興沈約陳郡謝朓瑯琊王融以氣類相推轂汝南周顒善識聲韻約等文皆用官商以



四聲製韻有平頭上尾蜂腰鶴膝五字之中音韻悉異  
兩句之內角徵不同不可增減世呼爲永明體厥以爲  
一人之思遲速天懸一家之文工拙壤隔何獨宮商律  
呂必責其如一如長門上林殆非一家之賦洛神池雁  
便成二體之作王粲初征他文未能稱是楊修敏捷暑  
賦彌日不獻與約書往復論難約論四聲雖妙有詮辯  
而諸賦往往與聲韻乖時論者以厥言爲是永元元年  
始安王遙光反父閑被誅厥坐繫尚方尋有赦厥感慟  
而卒年二十八文集行於世時有會稽虞炎以文學與  
沈約俱爲文惠太子所遇意盼殊常宮至驍騎將軍

東曹掾孔逵

孔逵山陰人有才藻製東都賦才士稱之陳郡謝滂年  
少時遊會稽還父莊問入東何見見逵否其見重於名  
流如此著三吳決錄不傳終於衛軍武陵王東曹掾

黃門侍郎陸子龍雲公

陸雲公字子龍厥弟桓之子也五歲誦論語毛詩九歲  
讀漢書略能記憶從祖倕與沛國劉顛執問十事雲公  
對無所失顛歎異之及長好學有才思爲平西湘東王



釋行參軍。雲公先製秦伯廟碑。吳興太守張纘罷郡。經途讀其文。歎曰。今之蔡伯喈也。纘至都。掌選。言之武帝。召爲尚書儀曹郎。入直壽光省。以本官知著作郎事。累遷中書黃門郎。兼掌著作。時天泉池新製鱗魚舟。形狹而短。帝暇日常泛此舟。朝中惟引太常劉之遴。國子到溉。右衛朱异。雲公時年位尚輕。亦預焉。太清元年卒。張纘時爲湘川。與雲公叔襄書曰。都信至。知黃門殞逝。非惟貴門喪寶。實爲有識同悲。其爲士流稱重如此。

黃門侍郎顧希馮野王

顧野王字希馮。吳郡海鹽人。巢之後也。祖子喬。父烜。俱以儒術顯。野王七歲讀五經。知大旨。九歲製日賦。領軍朱异竒之。十二歲隨父建安。撰建安地記。及長。徧觀經史。精記默識。天文地理。蓍龜占候。蟲篆竒字。圖畫無所不通。宣城王爲揚州刺史。野王及瑯琊王褒並爲賓。野王又善丹青。王於東府起齋。令野王画古賢。命王褒書贊。時人稱爲二絕。父卒。憂毀不勝喪。聞侯景亂。遂募兵。援都野王體素清羸。裁長六尺。又居喪過毀。殆不勝哀。及杖戈被甲。陳君臣之義。逆順之理。抗辭作色。見者莫



不壯之。天嘉中，勅補撰史學士，歷太子率更令，尋領大著作，掌國史，知梁史事。後為黃門侍郎，知五禮事。卒，贈秘書監，右軍將軍。所撰玉篇輿地志各三十卷，符瑞圖分野樞要續洞略一百卷，行於世。國史傳二百卷，未就而卒。有文集二十卷。

吏部尚書陸伯玉瓊 子從典附

陸瓊字伯玉，雲公之子。幼聰慧，有思理。六歲為五言詩，頗有詞采，號為神童。武帝召見，瓊風神警亮，進退詳審，帝甚異之。十一丁父憂，毀瘠有至性。從祖襄歎曰：此兒必荷門基，所謂一不為少。陳天嘉中，以文學累遷殿中郎，為陳文帝所賞。及討周迪，陳寶應等，都官符及諸大手筆，並中勅付瓊。歷官給事中，黃門侍郎，領大著作。初

父雲公奉梁武勅撰嘉瑞記，瓊述其旨而續焉。自永定訖於至德，勒成一家之言。遷吏部尚書，著作如故。至德四年卒，集二十卷，行於世。子從典，字由儀，幼聰敏。年八歲，讀沈約集，見回文硯銘，援筆擬之，便有佳致。十二作柳賦，其辭甚美。從父瑜特所賞愛。及瑜將終，命家中墳籍皆付之。位太子洗馬。陳亡入隋，官著作佐郎，尚書楊



素奏使從典續司馬遷史記訖於隋其書未就坐弟受漢王諒職免卒於南陽縣主簿

散騎常侍陸溫玉琰

弟瑜附

陸琰字溫玉梁記室參軍令公之子幼孤好學有志操州舉秀才累遷宜惠始興王外兵參軍直嘉德殿學士陳文帝聽覽餘暇頗留心史籍以琰博學善占誦引置左右常使製刀銘琰援筆立成無所點竄帝嗟賞久之賜衣一襲俄兼通直散騎常侍東宮管記以母憂去官卒追贈司農卿所製文筆多不存本後主求其遺文撰

成二卷弟瑜字幹玉少篤學美辭藻州舉秀才歷官東宮學士兄琰時爲管記並以才學娛侍左右時人比之二應瑜聰敏強記常受莊老於汝南周弘正學成實論於僧韜法師並通大旨時皇太子好學欲博覽羣書以子集繁多命瑜抄撰未成而卒太子爲之流涕追贈光祿卿有集十卷

隋 共四人

秘書丞姚伯審察

姚察字伯審武康人信之九世孫也六歲日誦萬餘言



不好戲弄。勵精學業。十二能屬文。聞見日博。十三梁簡文帝時在東宮。盛修文義。卽引於宣猷堂聽講。論難爲儒者所稱。陳大建初。補宣明殿學士。尋爲通直散騎常侍。報聘於周。江左耆舊。先在關右者。咸相傾慕。沛國劉臻。竊訪漢書疑事十餘條。並爲剖析。皆有經據。臻謂所親曰。名下定無虛士。察自居顯要。未嘗受人餽餉。有私送南布一端。花練一疋者。察謂曰。吾所衣着。止是麻布。蒲練於吾無用。此人遜請。察厲色驅出。自是莫敢餽遺。隋授秘書丞。別勅成梁陳二史。文帝嘗指察語朝臣曰。姚察學行。當今無比。我平陳唯得此一人。丁後母憂。毀哀逾制。時有白鳩巢於戶上。太業初。授太子內舍人。三年卒於東都。遺命薄葬。察性至孝。有人偷鑿識冲虛。譏遜。不以所長矜人。專志著書。白首不倦。所著漢書訓纂。說林。西聘玉璽。建康三鍾等記。文集六十餘卷。行於世。又撰梁陳史。未畢而卒。子思廉續成之。思廉自有傳。

秘書學士顧仲文彪 魯世達附

顧彪字仲文。餘杭人。博雅工文筆。尤明尚書春秋大業中。爲秘書學士。撰古文尚書二十卷。文集雜著百餘篇。



時同邑魯世達爲國子助教與彪齊名每有篇章一時傳播撰毛詩章句義疏四十二卷行於世

秘書學士虞士裕綽

虞綽字士裕餘姚人身長八尺姿容甚偉博學有雋才尤工草隸陳左衛將軍傅宰有盛名於世見綽辭賦歎謂人曰虞郎之文不可及也大業初拜秘書學士奉詔撰長洲玉鏡等書綽所筆削帝未嘗不稱善遷著作佐郎與族弟世南庾自直蔡允恭等四人常居禁中以文翰待詔恩盼隆洽從征遼東帝舍臨海頓見大鳥詔綽

爲銘帝覽而善之命有司勒於海上以渡遼功授建節尉綽恃才任氣無所降下著作郎諸葛穎以學業幸於帝綽每輕侮之由是有隙帝問綽於穎穎曰虞綽粗人也帝領之時禮部尚書楊玄感稱爲貴倨虛襟禮之與結布衣之交尋有告綽以禁內兵書借玄感者帝甚銜之及玄感敗以黨玄感賜死年五十四所著辭賦世多傳焉

唐共四十四人

弘文館學士姚思廉簡



姚思廉本名簡以字行吏部尚書察之子少承家學文譽雄於一時入隋爲漢王府參軍初察在陳嘗修梁陳二史未就死以屬思廉故思廉表父遺言有詔聽續遷代王侍讀高祖定京師府僚皆奔亡獨思廉侍王不去兵將升殿思廉厲聲曰唐公起義本安王室若等不得無禮於王衆始却布列階下帝義之聽扶王至順陽閣泣辭去觀者歎曰仁者有勇謂此人乎俄授秦王府文學王討徐圓朗嘗語隋事慨然歎曰姚思廉蒙素刃以明大節古所難者時思廉在洛陽遣使遺物三百段致書曰景想節義故有是贈秦王爲天策上將軍開府招賢置文學館以杜如晦及思廉等一十八人並以本官爲學士禮遇隆重時人艷之有十八學士登瀛洲之目及卽位復置弘文館以虞世南思廉兼領之嘗引入內殿講論前言徃行商確政事或至夜分乃罷加通直散騎以藩邸舊恩凡政事得失許密以聞思廉亦展盡無諱拜散騎常侍豐城縣男卒贈太常卿謚曰康陪葬昭陵

東宮學士賀德仁

兄德基附

文報蘇執人爲文



賀德仁山陰人與兄德基皆以文辭稱時人爲之語曰  
 學行可師賀德基文質彬彬賀德仁兄弟八人時以此  
 漢荀氏太守王仁改其所居里爲高陽云武德中除中  
 書舍人徙洗馬爲東宮學士貞觀初遷趙王友有集二  
 十卷藏於四庫

散騎常侍褚希明亮

曾祖湮父玠附

褚亮字希明錢唐人曾祖湮父玠皆有名梁陳間亮少

警敏博見圖史一經目輒志於心年十八請陳僕射徐

陵陵與語異之後主召見使賦詩江總諸詞人在席皆

服其工累遷尚書殿中侍郎入隋爲東宮學士遷太常

博士煬帝議改宗廟之制亮請依古七廟而太祖高祖

各一殿法周文武二祧與始祖而三餘則分室而祭始

祖二祧不從迭毀未及行坐與楊玄感善煬帝矜已疾

才因是亦貶西海司戶時博士潘徽貶威定主簿亮與

俱至隴山徽死爲歛瘞之人皆義亮後爲薛舉黃門侍

郎舉滅秦王謂曰寡人受命而來嘉於得賢公久事無

道君得無勞乎亮頓首謝曰舉不知天命抗王師今十

萬衆兵加其頸大王釋不誅豈獨亮蒙更生邪王悅賜



乘馬帛二百段，卽授王府文學。王每征伐，亮在軍中，嘗與秘謀，有裨補之益。貞觀中，累遷散騎常侍，封陽翟縣侯。卒年八十八，贈太常卿，陪葬昭陵，謚曰康。初，太宗作文學館，以亮與杜如晦等十八人並為學士，命闡立本圖像，使亮為之贊，題名字爵里，號十八學士。藏之書府，以章禮賢之重。當是時，在選中者，天下所嚮慕，謂之登瀛洲。子遂良，別有傳。

西臺舍人徐將道齊聃

子堅附

徐聃，一名齊聃，字將道，吳興長城人。八歲能文。太宗召

試，賜所佩金削刀。累官西臺舍人。咸亨初，詔突厥酋長

子弟從事東宮，聃上書諫，以為擅裘冒頓之裔，解辯削

衽，使在左右，非所謂恭慎威儀。以近有德之義，帝韙其

言，聃善文，詔帝愛之，令侍皇太子。諸王屬文，以職樞要，

許間日一至，坐漏禁中事。貶死欽州。卒年四十四。子堅

字元固，舉秀才及第，為汾州參軍事。東都留守楊再思

王方慶，共引為判官。方慶善禮樂，嘗就質疑。聃為申

釋，常得所未聞。屬文典厚，再思每目為鳳閣舍人。樣與

徐彥伯、劉知幾、張說、與修、三教、珠英、時、張昌宗、李嶠、總



領。彌年不下筆。堅與說專意撰綜條彙粗立諸儒因之。乃成書。累遷給事中。俄以禮部尚書爲修文館學士。睿宗卽位。進封東海郡公。遷黃門侍郎。初太平公主用事。武攸暨屢邀請堅。堅不許。又以妻岑曦女弟固辭機密。轉太子詹事。曰。吾非求高逃禍耳。曦敗。不染於惡。出爲絳州刺史。久乃遷秘書監。左散騎常侍。玄宗改麗政書院爲集賢院。以堅克學士。副張說知院事。帝大酺。集賢幔舍在百官上。說令揭大榜以侈其寵。堅見遽命撤之。曰。君子烏取多上人。從上泰山以參定儀典。加光祿大夫。卒年七十餘。贈太子少保。謚曰文。齊贈姑爲太宗克容。仲爲高宗婕妤。好皆明圖史。議者以堅父子如漢班氏云。

內史舍人孔紹安

子禎孫季詡孫萬壽附

孔紹安。越州山陰人。與兄紹新。早知名。陳亡。客居鄆。勵志於學。外兄虞世南曰。本朝淪覆。吾分湮滅。有弟若此。知不亡矣。紹安與孫萬壽。皆以文辭稱。時謂之孫孔。隋大業末。爲監察御史。高祖討賊河東。紹安與夏戾端同監軍。禮遇尤密。帝受禪。端先歸。拜秘書監。已而紹安間



道走長安帝悅擢內史舍人子禎歷監察御史門無賓  
 謁時譏其介禎子季詡字季和擢制科授秘書郎陳子  
 昂稱其神清韻遠可比衛玠

溧陽尉孟東野郊

孟郊字東野湖州武康人少隱嵩山性介少諧合韓愈  
 一見為忘形交年五十始登第調溧陽尉縣有投金瀨  
 平陵城林薄蒙翳下有積水郊間往坐水傍裴回賦詩  
 鄭餘慶為東都留守奏為水陸轉運判官試協律郎餘  
 慶鎮興元復奏為行軍參謀卒年六十四張籍謚曰貞  
 曜先生郊為詩有理致最為韓愈所稱然思苦奇澀李  
 觀亦論其詩曰高處在古無上平處下顧二謝

監察御史吳少微

子鞏附

吳少微淳安人與武功富嘉謨相友善長安中擢進士  
 第俱尉晉陽又有魏郡谷倚者並富文辭號北京三傑  
 時天下文章尚徐庾浮俚獨少微嘉謨本經術雅厚雄  
 邁人爭慕之號吳富體與修三教珠英以常嗣立薦並  
 為左臺監察御史已而嘉謨死少微哭之慟尋亦卒少  
 微嘗撰崇福寺鐘銘最為高雅作者推重并州長史張



仁。亶。待。以。殊。禮。代。仁。亶。作。九。鼎。銘。詞。亦。典。則。其。爲。詩。通。  
莊。道。勁。沉。鬱。克。揚。如。濃。雲。密。布。雷。電。勃。興。令。人。神。駭。驚。  
囑。不。可。正。視。子。鞏。開。元。擢。第。爲。中。書。舍。人。亦。以。能。詩。世。  
其。家。

楊衡

楊衡。吳。興。人。以。詩。名。有。盜。其。詩。以。登。第。者。衡。因。詣。闕。亦。  
登。第。偶。與。盜。詩。者。遇。盛。怒。詰。之。曰。一。一。崔。聲。飛。上。天。在。  
否。答。曰。此。句。知。兄。最。惜。不。敢。偷。衡。笑。曰。猶。可。恕。也。孟。東。  
野。有。悼。楊。衡。詩。

中書舍人朱德源巨川

朱。巨。川。字。德。源。嘉。興。人。年。二。十。以。明。經。擢。第。嘗。著。四。皓。  
碑。磅。礪。君。臣。之。際。表。章。出。處。之。跡。正。或。蒙。難。顯。黜。於。晦。  
柔。能。麗。明。語。賢。於。默。道。弘。藏。衍。義。與。定。傾。識。者。已。知。其。  
有。易。諒。佐。檢。之。風。已。而。北。戎。病。燕。華。夏。爭。土。巨。川。乃。深。  
居。里。巷。讀。書。養。母。考。經。義。之。箋。訓。撰。策。書。之。讚。序。每。立。  
新。評。必。度。常。均。將。欲。含。堅。超。長。鍼。育。起。痼。又。著。睢。陽。守。  
城。論。一。篇。以。爲。義。者。忠。之。徒。危。者。節。之。末。苟。忘。義。以。自。  
重。是。臨。節。而。可。移。固。以。探。二。公。之。心。垂。萬。古。之。訓。使。違。



難者銷聲以結舌。苟生者寄愧而終身。斯深於春秋而不義者遠矣。尋以賢能舉授左衛率府兵曹參軍。改陸州錄事參軍。召拜監察御史。擢左補闕。內供奉。傳納從容。休問昭晰。擢起居舍人。知制誥。拜中書舍人。凡載書之傳信者。贊書之加命者。詔策之封崇者。愍策之褒厚者。其辭必溫其道必直。洪而不放。纖而不繁。時稱作者。建中四年。遘疾卒。得年五十有九。北海李紆銘其墓。銘曰。猗朱君。秉國文星。廻漢鼎。歆汾勺。吳邑靈海濱。降精英宅。還真門。脩夜非我。春聳孤石。垂後人。

監察御史舒元輿

舒元輿。婺州東陽人。始學。卽穎悟。元和中。舉進士。見有一唱名。乃得入。列棘圍。席坐廡下。因上書言。古貢士未有輕於此者。且宰相公卿由此出。夫宰相公卿非賢不在。選而有司以隸人待之。誠非所以下賢。意羅棘遮截。疑其奸。又非所以求忠直也。詩賦微藝。斷離經傳。非所以觀人文化成也。臣恐賢者遠辱自引去。而不肖者爲階用也。今貢珠貝金玉有司。承以篋筥皮幣。何輕賢者。



重金玉耶。又言取士不宜限數。今有司多者三十，少者二十，假令歲有百元，凱而曰：吾格取二十，謂求賢可乎？歲有才德纔數人，而曰：必取二十，謬進者乃過半，謂合格，令可乎？俄擢高第，調樗尉，有能名。裴度表掌典元書記文，檄豪健，一時推許。拜監察御史，按刻深害，無所縱。再遷刑部員外郎。元輿自負，才有過人者，銳進取。太和中，獻文闕下，不得報。上書自言：馬周、張嘉正，代人作奏，起逆旅，卒為名臣。今臣備位於朝，自陳文章，凡五晦朔，不一報。竊自謂才不後周嘉正，而無因人，又不露所蘊，是終無振發時也。漢主父偃、徐樂、嚴安，以布衣上書朝奏，暮召而臣所上八萬言，其文鍛鍊精粹，出入今古數千百年，披剔刮抉，有可以補教化者，未始遺拔犀之角，擢象之齒。豈主父等可比哉！盛世難逢，竊自愛惜。文宗得書，高其自激，昂出示宰相李宗閔。以元輿浮躁誕肆，不可用。改著作郎，分司東都。時李訓居喪，與元輿善。及訓用事，再遷左郎中。不三月，以本官同中書門下平章事。元輿嘗為牡丹賦一篇，時稱其工。死後，帝觀牡丹，凭殿闌，誦賦為之泣下。



秘書監賀季真知章

子僧子附

賀知章字季真永興人性曠夷善談說族姑子陸象先嘗謂人曰季真清談風流吾一日不見則鄙吝生矣嗣聖初擢進士累官禮部侍郎兼集賢院學士玄宗自贊賜之肅宗爲太子知章遷賓客秘書監知章晚節務誕放遨嬉里巷自號四明狂客每醉輒屬辭筆不停書咸有可觀善草隸好事者具筆硯從之纔數十字世傳以爲寶天寶初病夢遊帝居數日寤乃請爲道士還鄉里詔許之以宅爲千秋觀又求鏡湖數頃爲放生池詔賜鏡湖剡川一曲旣行帝賜詩皇太子百官餞送擢其子僧子爲會稽郡司馬賜緋魚使侍養卒年八十六贈禮部尚書

殿中侍御史沈下賢

下賢字下賢歸安人居小敷山下學於韓退之與皇甫湜詩文往來太和初登第適李同捷反朝廷授栢耆德利行營諸軍計會使下賢以殿中侍御史爲其判官會李祐平德州同捷窮請降耆欲襲誅之以掩其功下賢之曰業請降已而襲之恐生諸將心且殺降不祥軍志



之明戒也者不聽竟馳入滄誅同捷諸將嫉其專冒比  
奏功攢詆之文宗不得已貶耆循州司戶參軍亞之貶

南康尉

工部郎中皇甫持正湜

子松附

皇甫湜字持正淳安人元和中爲陸渾尉應賢良方正  
對策與李宗閔牛僧孺俱第一宰相李吉甫惡其言直  
泣訴於上且言湜爲翰林學士王涯甥涯不先言坐貶  
湜不調久之遷工部郎中卞急使酒數忤同省求分司  
東都留守裴度辟爲判官度修福先寺立碑求文於白  
居易湜怒曰近舍湜而遠取居易願從此辭度謝之湜  
卽請斗酒飲酣援筆立就度贈以車馬繒絲甚厚湜大  
怒曰自吾爲顧况集序未嘗許人今碑文三千字字三  
緘何遇我薄耶度笑曰不羈之才也從而酬之韓愈爲  
河南尹愛其才厚禮之遂爲韓門弟子與李翱張籍齊  
名有文集行於世子松工文辭嘗著醉鄉日月三卷備  
述飲中事宜全於酒者也大隱一賦尤爲綺麗如牛翁  
虎僕等語足稱博雅而其得名乃在樂府宮詞大都非  
出於風人莊士之口持正之家學不無少損云



沈千運

沈千運，吳興人。食貧篤學，攻苦詩文，力追作者。後生多取法之，以詩益窮。至老不廢吟哦。年七十餘卒。元結篋中集云：沈千運獨挺於流伍之中，強振於已溺之後。窮老不惑，五十餘年，凡所為文，皆與時異。故朋友後生，稍見師效，能似類者五六人焉。嗚呼！自沈公及二三子，皆以正直而無祿位，皆以忠信而久貧賤，皆以仁讓而至喪亡。異於是者，顯榮當世，誰為辯士？吾欲問之，其為通人所歎息如此。王季友《張籍集中》皆有過吳興沈千運。

舊居詩

中書舍人徐季海浩

徐浩，字季海，會稽人。擢明經，有文辭，為集賢校理。張說見浩五色鶴賦，歎曰：「後來之英也。」肅宗朝授中書舍人，詔令誥策，皆出其手。遣辭贍速，而書法甚精。帝嘉之，又參太上皇誥冊，寵絕一時。授兼尚書右丞。浩建言：「故事有司斷獄，必刑部審覆。」自李林甫、楊國忠當國，專作威福，令有至宰相府斷事，尚書以下未省。即署，垂慎卹意。請如故事，便詔可。進郡公。卒年八十，贈太子少師，謚曰。



定

進士施希聖肩吾

徐凝附

施肩吾字希聖睦州人元和十年與徐凝同舉進士隱於洪州西山終身不仕自序其詩云二十年辛苦烟蘿松月之下或時學龜息蟬飲而不食腸胃無滓形神益清見天地六合之奧凡奇兆異狀閱乎心目者銳思一搜皆落我文字網中幽不可追也後或傳尸解而去疑與肩吾同里元和中以詩名與元白相結官至金部侍郎

著作郎顧逋翁况

子非熊附

顧况字逋翁居海鹽縣西三十里橫山禪寂寺側才華而真率翁輕清以為性結冷汰以為質煦鮮榮以為辭眸子瞭然炯炯清立望之真白圭振鷺也偏於逸歌長句駿發踔厲往往若穿天心出月脇意外驚人語非尋常所能及最為快也至德二載進士與柳渾李泌為方外友德宗時渾秉政召為秘書郎及李泌為相自謂得達官久之遷著作郎坐詩語調諛貶饒州司戶累歲脫縻無復出意結廬茅山號華陽真逸壽九十卒有集十



五卷子非熊讀書一覽成誦好辯說氣談凌轢為衆所抑久不第而名在朝野長慶中放榜非熊復下第穆宗怪之詔有司進所試覽之稱旨追榜勅賜及第大中間歷盱眙尉慕父風棄官亦隱茅山或傳非熊得長生術云

著作郎孔惟微至

孔至字惟微若思之子也歷著作郎明氏族學與韋述蕭穎士柳沖齊名撰百家類例以張說等為近世新族剝去之說子垣方有寵怒曰天下族姓何與若事而妄紛紛耶初書成以示韋述述謂可傳及聞垣語或欲增損之述曰止大丈夫奮筆成一家書奈何因人動搖有死不可時述穎士沖皆換類例而至書稱工

包進士融

子何佶附

包融烏程人舉開元進士第任集賢院學士與故鄣萬齊會稽賀朝江南荆臣才名振世時稱包萬荆賀融二子何佶皆以文世其家

散騎常侍馮介夫定

兄宿附

馮定字介夫婺州東陽人博學工文辭與兄宿齊名人



方漢之二。馮遷太常少卿。文宗嘗詔開元霓裳羽衣舞。參以雲韶。肄於庭。定部諸工。立懸間。端凝若植。帝異之。問學士李珣。珣以定對。帝喜曰。豈非能古章句者邪。親誦定送客西江詩。召升殿。賜官中瑞錦。詔悉所著。以上遷諫議大夫。以左散騎常侍致仕。卒。初源寂使新羅。其國人傳定黑水碑。画鶴記。韋休符使西番。所館寫定商山記於屏。其名播戎夷如此。

秘書郎錢起

錢起長興人。登天寶進士第。任秘書郎。少博雅。以能詩名。其初隨計吏也。寓於驛舍。聞有吟者。云曲終人不見。江上數峯青。及就試。賦湘靈鼓瑟詩。結句未得。因以二語足之。主司曰神句也。遂居首選。大曆中與郎士元俱以詩名。士林爲之語曰。前有沈宋。後有錢郎。公卿出牧。奉使二人。無詩祖。行人以爲耻。有集十一卷。子徽別有

傳

丹徒縣尉項子遷斯

項斯字子遷。台州人。會昌二年進士及第。爲丹徒縣尉。卒官。斯於寶元開成之際。聲價特甚。楊敬之雅愛其詩。



所至稱之。所謂平生不解藏人善，到處逢人說項斯者，是也。斯有詩集行世。水部張埴序之。埴以斯為江東人。

協律郎章八元

子孝標孫碣附

章八元，桐廬人。登大曆六年進士。貞元中，調句容主簿。遷協律郎。少從會稽嚴維學詩，有悟號。章才子，嘗於郵亭偶題數句，益激元。楚以辭家也，維大異之，遂親指喻。數年克賦擢第，其題慈恩塔詩，元白名家，深為詫異。且謂不意嚴維出此弟子。與郡司馬劉長卿更相唱和。長卿酬句有云：貧家唯好月，深媿子猷過。其為名流賞鑒如此。

子孝標，登元和中進士第，為山南東道從事。試大理寺評事，初孝標下第，流輩多為詩以刺主司。孝標作海燕詩，獨存忠厚。侍郎庾承宣展轉吟諷，卒以受知。孫碣登乾符三年進士，詩多佳致，深得風人雅致。有集一卷行於世。

職方員外郎袁還朴不約

袁不約，字還朴，新城人。登長慶三年進士，又試平判入等。仕至職方員外郎。有袁不約集一卷，羅隱撰新城築記有云：天下無事，吾鄉則有。凌準吳降，袁不約以文學



進。

方雄飛干

方干字雄飛桐廬人咸通中屢舉進士不第初居縣之  
鷓鴣源後隱鑑湖時徐凝有詩名一見噐之授以詩律  
干貌寢陋又兔缺而喜陵侮嘗謁蕙帥誤三拜人號方  
三拜晚遇醫補其唇又號補唇先生其詩清潤小巧率  
多警句蕙帥方薦於朝而干則死矣門人私謚曰玄英  
先生有集十卷行於世舍人王贊云干之爲詩侵肌滌  
骨氷瑩霞絢嘉肴自將不吮餘雋麗不葩紛苦不癢棘  
當其得志倏與神會詞若未至意已獨然孫郛云先生  
爲詩高堅峻拔其秀也僊遊於常花其鳴也靈簫於衆  
響咸通乾符廣明中和間爲律詩江之南未有及者光  
化中補缺韋莊始奏追賜及第唐末宰臣張文蔚中書  
舍人封舜卿奏名儒不遇者十有五人請賜一官以慰  
冥魂干其一也後宋景祐間范文正公守睦州過其故  
居想像遺風繪像於釣臺以配子陵

戶部侍郎吳子華融

祖翥附

吳融字子華山陰人祖翥有時名大中時徵辟不赴賜



號文簡先生。融學益自力，富辭調。龍紀初，舉進士。帝昭度討蜀，表掌書記。累遷御史，歷翰林學士。昭宗反正，御南闕，羣臣稱賀。融最先，至於時，左右驩駭。帝有指授，疊十許稿，融跪作詔，少選而成。語當意詳，帝咨賞良厚。進戶部侍郎，有詩四卷行於世。

閻士和

閻士和，烏程橫山人。以詩名於時，隱居不仕，結庵道場山下，名之曰歸雲。與僧皎然爲方外交，皎然嘗有舟行寄懷詩云：二月湖南春草遍，橫山渡口花如霰。相思一日在孤舟，空見歸雲兩三片。其標致蓋可想也。

工部尚書陸祥文

陸宸，字祥文，嘉興人。宣公贄之族孫也。光啓二年，舉進士第一。累遷翰林學士。宸屬辭敏，瞻若注射，然一時詞臣皆以爲不及。昭宗甚寵異之，常侍金鑾作賦，帝嘆曰：朕聞貞元時有陸贄能作內廷文書，今得卿斯文，不墜矣。遷尚書左丞，同中書門下平章事，進階光祿大夫。嘉興縣男，尋貶陝州刺史。久之，授工部尚書，從帝自華州還，封吳郡開國公。



嚴子重憚

嚴憚字子重，烏程人。博學能詩，尤工七字，清便柔媚。逸於常軌，十舉不第。卒，皮日休傷之，其詩序云：予爲童在鄉校時，簡上抄杜舍人牧之集，有與進士嚴憚詩。後至吳，一日有客曰：嚴憚，予志其名久矣。遠懷文見造，於是樂得禮而觀之。生舉進士，亦十餘計，偕予方寃之，謂竟有得於時也。未幾歸吳興，後兩月，嘗人至云：生以疾亡矣。噫！生徒以文辭聞於士大夫，竟不名而逝，豈止此而湮沒邪？於是哭而爲之詩云：其詩是也。

和州刺史凌宗一準

凌準，字宗一，富春人。以孝友聞，工文辭。著後漢春秋二十餘萬言。準爲人有謀略，尚氣節。年二十，以書干丞相，擢崇文館校書郎。又以金吾兵曹爲邠寧節度掌書記。涇源之亂，以謀畫佐元戎，有大功。累遷殿中侍御史、浙東廉訪使、判官、村循疲人，按驗汚吏，吏民敬愛。召爲翰林學士，遂爲尚書。由本職叅度支，調發出納，有方。出爲和州刺史，降連州司馬卒。

給事中羅昭諫隱

子塞翁附



羅隱字昭諫餘杭人隱居池之梅根浦自號江東生性傲睨工詩博物多智好譏評人物舉進士不第病卧長安屬旱詔祈雨作法隱上疏諫其辭婉轉規諷復從事湘南歷淮潤不得意歸謁錢鏐表爲錢塘令遷著作郎後爲鎮海軍節度掌書記鏐時初授鎮海節度命隱草謝表朝廷見之曰此羅隱詞也賀昭宗更名曄表曰左則姬昌之半字右則虞舜之全文京師稱爲第一朱溫篡唐隱說鏐舉兵討梁曰縱無成功猶可退保杭越奈何交臂事賊爲終古羞鏐雖不用心甚嘉之累遷諫議大夫給事中卒隱爲詞章有風力於詩尤工與同姓虬鄴齊名時號三羅舊隄江常有二氣夜旦天及隱與杜建徽生氣不復見識者以爲文武秀氣鍾焉隱著湘南甲乙集淮海寓言及讒書六十一篇行於世子塞翁爲鎮海軍節度推官善畫羊超妙絕於一時

五代 凡一人

### 嚴州刺史劉昭禹

劉昭禹金華人博學爲詩刻苦嘗自云句向夜深得心從天外歸後任湖南爲天策府學士嚴州刺史有詩三



百篇

兩浙名賢錄卷之四十五終

兩浙名賢錄卷四十六目次

文苑

宋

翰林學士錢希白易

兄昆附

侍中錢希聖惟演

公安謝化南炎

邵正字煥

集賢院學士楊子正

鮑弱翁剛

葉郎中參

子清臣附

職方員外郎齊祖之唐

姚寶臣鉉

施昌言附

殿中丞方公輔仲謀

屯田郎謝師厚景初

進士吳可幾

弟知幾輔



郡丞楊公濟蟠

都官郎張先

徐教授無黨

知南雍周庶彥鏗

晉陵令陸元光蒙老

吳縣令沈睿達遠

毛筠州維瞻

劉燾

安撫使陳思予汝錫

秘書正字周汝成邦彥

司勳郎鮑欽止慎由

毛秀州澤民滂

魯虔州伯能

林國材幹

洪州錄參萬先之庚

新喻尉喻季直良弼

喻良能何恪陳炳附

潘雄飛翼

中書舍人范元卿端臣

集英殿修撰何德輔甫

樞密院編修官姚令威寬

滕元秀岑

林進士伯仁越

南陵尉蔣朝式則

進士王子潤壁

江東提刑王順伯厚之

太府卿王清叔卿月

衡陽簿薛持志寘

朝奉大夫華安仁鎮

子初平附

知臨安鞏仲至豐

隆興教授陳彥羣季雅

守興化軍樓叔暘昉

弟昞附

閣門舍人潘德久樞

父文虎附

趙紫芝師秀

翁卷徐璣附

徐道輝照

著作郎劉安道澹然

周會卿學古

子宗夷孫如堅附



國子助教陳繹魯

秘書少監俞兼善享宗

北門學士盧申之祖臯

翰林學士應之道儵

國子司業陳壽老者卿

萬竹先生高端叔元之

趙叔午汝迂

神童柴蒙亨

趙幾道汝回

時天彝少章

嚴州司戶趙澤民崇滋

閩風先生舒舜侯嶽祥

忠州判官趙季清善得

解元姚正子夢午

戴復古式之

父東臯子附

黃彥實叔英

處州教授邵德芳桂子

編修林能一千之

尹耕道起莘

薛叔容據

翰林承旨趙子固孟堅

孫因晉

知江寧莫光朝

元

學錄鄭德仲芳叔

子覺民附

于介翁石

淵穎先生吳立夫萊

教授戴帥初表元

任士林附

黃宏

侍講學士袁伯長楠

翰林待制柳道傳貫

趙子昂孟頫

夫人管氏子雍附

翰林學士陳子經經

祖著父泌附

儒學提舉白廷玉珽



金叔肖似孫 陳景傳堯道 父希聲弟舜道附

吳見心復 徐秉國鈞

寧國司理楊仲弘載 傅景文野

仇仁近遠 應彥文文虎

翰林承旨張仲舉翥 甌寧縣丞盛明叟

秘書監丞李季和孝光 葉景修森

姚時和應鳳 奎章閣博士柯敬仲九思

馮士願 高則誠明

桐廬李文 莫景行維賢

赤城令楊庶夫維楨 附自傳 戴叔能良

孫以貞固 諮議參軍王元章冕

梁建中 林愚齋靜

沈元吉貞

兩浙名賢錄卷四十六目次終



兩浙名賢錄卷之四十六

東海徐象梅仲和氏謨

吳興茅維孝若氏閱

文苑

宋 共八十四人

翰林學士錢希白易

兄昆附

錢易字希白先世臨安人自其父吳越王侗為大將胡進思所廢始居會稽而立其弟俶歸朝羣從悉補官易與兄昆獨不見錄遂刻志讀書年十七舉進士御試三



題日中而就。有司以其輕俊黜之。然自此以文。蒞知名。太宗嘗語蘓易簡曰。朕恨不與李白同時。易簡曰。今進士錢易爲歌詩。殆不下白。欲用唐故事。召至禁林。不果。咸平二年。再舉進士甲科。爲光祿寺丞。景德中。舉賢良方正科。策入等。擢至翰林學士。卒。易才思敏。贍數千百言。立就。真宗封泰山。獻殊祥錄。汜汾陰。命修車駕所過圖。經獻宋雅一篇。易歌詩有義山長吉體。而俊逸過之。又善行草。有集一百六十卷。青雲總錄一百卷。洞微志十卷。兄昆亦能詩。善草隸。舉淳化中進士。歷十州治尚寬簡。累官右諫議大夫。以秘書監老於家。

侍中錢希聖性演

錢惟演。字希聖。俶之子。幼有俊才。從俶歸朝。爲右屯衛將軍。博學能文。舜召試學士院。以笏起草。立就。真宗稱善。改太僕少卿。獻咸平聖政錄。命直秘閣。預修冊府元龜。大中祥符八年。擢知制誥。翰林學士。累遷兵部樞密使。除大名軍節度使。知河南。加同平章事。判許州。上耕籍。入侍祠。爲景靈宮使。判河南。改鎮崇信。卒。贈侍中。謚文僖。惟演出於勲貴。文章清麗。名與楊億。劉筠。相上下。



於書無不讀，嘗曰：學士備顧問，不可不該博。故其家聚書，年於秘府，所著有典懿集、樞庭擢髦前後集、伊川漢上集、金坡遺事錄、飛白書、叙錄、逢辰錄、奉藩書事諸書行於世。

### 公安謝化南炎

謝炎，字化南，嘉興人。爲文慕韓柳，與盧積、齊名。積與懦、炎勁急性相反，而相厚善。時稱盧謝端拱，初舉進士，補昭應主簿，徙伊闕，連知華容、公安二縣，治績粲然。有集二十卷。

### 邵正字煥

邵煥，淳安人。登進士第，官至金部員外郎。煥英年挺秀，精於蒸逼，人七歲時隨父兄應舉，時郡方建鼓樓，題詩於壁，援筆而就。郡守杜惟一奇之，奏令赴闕。真宗以其年幼，賜帛遣歸。咸平三年，十歲，復以童子召赴闕，令賦春雨詩，頃刻而成，文不加點。是年登進士第，除正字，令於秘閣讀書。上嘗引之入宮，命賦睡宮娥詩，煥應聲云：玉腕枕香腮，荷花藕上開。乃命就職。

### 集賢院學士楊子正大雅



楊大雅字子正錢塘人十歲作雪賦稍長日誦書數萬言端拱二年乙科登第咸平三年交趾獻犀大雅獻犀賦召試學士明年上書獻所爲文二十餘萬言乃直集賢院歷二十五年不遷或笑其違世自守大雅歎曰吾不學乎世學乎聖人吾之所有不敢以薦於人而嘗自獻於天子矣天禧中賜淮南循江按部過金陵江上遇風冠服盡失丁謂遣人遺衣一襲大雅不受謂以爲歎宰相王欽若亦不悅晚與陳從易並知制誥出知亳州卒所著有大隱集職林兩漢傳聞若干卷大雅幼孤自立刻苦爲文躬儉約不妄進取人知其爲有德君子子洎濬泳漸沆瀁六人

鮑弱翁剛

鮑剛字弱翁括蒼人少負大節善屬文尤長於詩始舉進士不第卽毅然曰此非吾所學也遂徜徉於東南山水間俗事略不關意時將士陶弼以詩名少許可得剛所作以爲出已上願得爲友剛亦雅聞弼因徒步歸之初剛與呂惠卿善熙寧中惠卿叅知政事欲用剛剛曰吾老矣卽日出京師竟卒於秦州旅邸



葉郎中參

子清臣附

葉參，烏程人。博學多文，工於筆札。宋初，州人業儒者寡，參卓然自立，苦志讀書，不爲流俗所移。咸平中，登進士第，累官兵部郎中，出守鄉郡。子清臣，天聖初舉進士，踐西掖北門之選，詞章炳蔚，馳譽一時。

職方員外郎齊祖之唐

齊唐，字祖之，山陰人。唐觀察使澣之後也。少貧苦，學得書，輒手錄之，過誦不忘。郡從事魏庭堅聞之，謂唐曰：「今士多不讀書。」唐曰：「幸公任意，以几上書，令唐一誦之。」

庭堅以一帙開示，乃文選頭陀寺記，而唐誦不遺一字。

庭堅大驚服。登天聖八年進士，嘗進龍韜豹略賦，兩應制科，對策皆第一。當路忌其切直，復排去之。後爲南雄州僉判，會交趾進麒麟，唐據史傳非之，斥蠻人給中國衆服，其博物以職方員外郎致仕。卒，初鑑湖東北有山，巋然與禹陵相望，最爲山水奇絕處。唐命其山曰少微，而卜築焉。所著有學苑精英，少微集，各三十卷。

姚寶臣鉉

施昌言附

姚鉉，字寶臣，吳興人。博綜羣籍，能文辭。嘗取有唐一代



之文，拔其尤者，得百卷，題曰《文粹》。當時服其精確，以比  
昭明文選。鉉自爲序，其略曰：有唐三百年，用文治天下，  
陳子昂起於庸蜀，始振風雅。繇是沈宋嗣興，李杜傑出，  
六義四始，一變至道。洎張燕公以輔相之才，專誤述之，  
任雄辯逸氣，聳動羣聽。繇許公繼以宏麗，丕變習俗，而  
後蕭李以二雅之辭，本述作常楊以三盤之體，演絲綸，  
郁郁之文，於是乎在。惟韓吏部超卓羣流，獨高遠古，以  
二帝三王爲根本，以六經四教爲宗師。憑陵輔轡，首唱  
古文，遏橫流於昏墊，闢正道於坦夷。於是柳子厚、李元  
賓、李翱、皇甫湜，又從而和之。則我先聖孔子之道，炳然  
懸諸日月，故論者以退之之文，可繼楊孟斯得之矣。至  
於賈常侍、至李補闕、翰元、容州、結獨孤、常州及呂衡州、  
溫、梁補闕、肅、樞文公、德輿、劉賓客、禹錫、白尚書、居易、元  
江夏、稹，皆文之雄傑者。與世謂貞元、元和之間，辭人咳  
唾成珠玉，豈虛也哉！鉉徧閱羣籍，耽玩研究，掇菁擷華，  
十年於茲，得古賦、樂章、歌詩、贊頌、碑銘、文論、箴議、表奏、  
傳錄、書序，凡爲一百卷，命之曰《文粹》。止以古雅爲命，不  
以雕琢爲工，披而覽之，李唐一代之文在是矣。時同邑



施昌言爲撰後序仕殿中侍御史亦一時文士也

殿中丞方公輔仲謀

方仲謀字公輔青谿人登進士第累官殿中丞仲謀稟性貞介而文滌蔚然其爲詩不事雕鏤聲律渾厚有神綜獨運之能無纖穠華媚之態一時稱爲作者有雉山集二十卷行於世

屯田郎謝師厚景初

謝景初字師厚絳之子也慶曆六年甲科及第以大理評事知越州餘姚縣始作海塘防水患民賴以安累遷益州路提點刑獄以屯田郎致仕景初性倜儻勁峭博學能文尤長於詩子婿黃庭堅以詩名家庭堅自謂本從謝公得句法

進士吳可幾

弟知幾附

吳可幾吳興安吉州人舉景祐二年唐卿榜進士好古博雅與弟知幾相繼登第以文章雄視一世時以方吳之二陸可幾所著有千姓編知幾性尤篤孝父歿廬墓三年平地泉涌人稱曰孝子泉

郡丞楊公濟蟠



楊蟠字公濟臨安人登慶曆六年進士第嘗作錢塘百  
詠詩歐陽修讀其集有詩云蘓梅久作黃泉客我亦今  
爲白髮翁卧讀楊蟠一千首乞渠秋月與春風王安石  
有答蟠書曰讀足下之文但知畏之願造所聞蘓軾守  
杭蟠丞郡與軾倡酬平生爲詩數千篇後知壽州提點  
荆廣鑄錢卒

都官郎張先

張先烏程人登康定進士第歷都官郎中詩格清麗尤  
工於樂府有雲破月來花弄影浮萍破處見山影隔牆  
送過鞦韆影等句時號張三影年八十九卒有文集一  
百卷

徐教授無黨

徐無黨永康人從歐陽脩學古文辭脩嘗稱其文日進  
如水涌而山出又云馳騁之際非常人筆力可到嘗註  
五代史妙得良史筆意皇祐中以南省第一人登進士  
第仕止郡教授而卒惜勿究厥施云

知南雍周蕙彦鏐

周鏐字蕙彦鄞人師厚之長子也生而秀穎十歲如成



人十四入太學力學勤苦登元豐二年進士第益究六籍諸子百氏之說悉論著其本旨爲文踔厲兢爽超古作者不以絺章繪句爲工言必期於有用旁至天文地理罔不該博初調桐城尉辭不赴祭酒豐稷給事中范祖禹力薦之起知南雄以言邊事忤時相入黨籍退休西湖作四休堂日吟哦山水間所著有文集三十卷承宣集一卷明天集一卷六甲奇書一卷

晉陵令陸元光蒙老

陸蒙老字元光歸安人博學喜吟咏嘗爲晉陵宰時州幕官有好讒同列者一日同會聞蟬幕謂陸曰君可詠此陸卽席詠曰綠陰深處汝行藏風露從來是稻梁莫倚高枝縱繁響也宜回首顧螳螂其人聞之自是少戢

吳縣令沈睿達遼

沈遼字睿達錢塘人邁弟也少好學傲睨一世讀左氏班固書少摹倣之輒近似乃鋤植縱舍自成一家長於詩歌尤工翰墨王安石魯布皆學其筆法安石得其清勁布得其真楷趣恭高爽飄飄然有物外意絕不喜進取登第後游京師偶爲人書裙帶內侍買入禁中神宗



初嗣位，勵精求治，見之不悅，會遣使察訪兩浙，就以諭之。時遼爲吳縣令，遂遭劾，王安石救之，不能釋，乃坐削籍。後卜居池陽，築室曰雲巢。好事者多往遊焉。遼追悔平生不自貴重，悉謝棄，少習杜門，隱几作爲文章，雄偉綺鍊，曾鞏、蘇軾、黃庭堅皆與唱酬，然竟不復起。元豐末卒，所著有雲巢編。

毛筠州維瞻

毛維瞻，西安人，以詩名。與趙清獻、杜同里相得，爲山林之樂。元豐中，出知筠州，政平訟理，民惟樂之，如親父母。時蘇子由謫筠州，監酒，相與唱和，有鳳山八詠，山房卽事十絕，傳誦藝林。

劉燾

劉燾，長興人，生而警敏，讀書目數行下，終身不忘。工文辭，捉筆立就，無淹思，弱冠游太學，與陳亨伯等以八俊稱。元祐三年，蘇軾知貢舉，賞其文章，與雅，置之高第。尤工書法，筆勢遒勁，黃庭堅嘗曰：「江左又生羊欣矣。」有見

南山集

安撫使陳思予汝錫



陳汝錫字思予，青田人。幼穎悟博學，善屬文。或以其詩示黃庭堅，堅有閒愁莫浪遣，留爲痛飲資。黃擊節歎賞曰：我輩人也。登紹聖四年進士。邑之登第者自汝錫始。提舉福建學事，官至浙東安撫使，卒。贈中大夫。有《霍溪集》十二卷。

秘書正字周汝成邦彥

周邦彥字汝成，錢塘人。踈曠少檢，不爲州里推重。而博涉百家之書。元豐初游京師，獻汴都賦萬餘言。神宗異之，命侍臣讀於迺英閣，召赴政事堂。自太學諸生一命

爲正字，五歲不遷。益肆力於文章，出教廬州，知溧水縣。遷爲國子主簿，哲宗召對，使誦前賦，除秘書正字。歷校書郎，累官至徽猷閣待制，出知順昌府，自號清真居士。有《清真集》二十四卷。

司勳郎鮑欽止慎由

鮑慎由字欽止，龍泉人。少侍父克祿官湖外，時同邑何琬在長沙，大燕文士，慎由以少年坐末，坐卽席命賦，畫舫詩，慎由立就，意新詞警，文不加點，張舜民輩皆驚曰：此郎他日必以文藝顯。後登元祐進士，召對上，曰：見卿



何晚邪。除工部員外郎。歷司勳考功。內外所至。有聲坐  
黨禁流落。註杜詩。又註夷白堂集。神宗嘗御札飛白書  
夷白堂三大字。賜之。其出以少事坐未坐。明命。金。湖。田  
毛秀州澤民。滂。其人。也。許。父。京。縣。官。德。代。都。同。邑。同  
毛滂。字澤民。江山人。元祐中。蘓軾守錢塘。滂爲法曹。秩  
滿。辭去。是夕。燕客。有籍妓歌贈別。小詞。落句云。今夜山  
深處。斷魂分付潮回去。軾以爲佳。因問妓誰作。以毛法  
曹對。軾語客曰。郡寮有此詞人。不及知軾之罪也。翌日  
折簡追還。留連數月。滂因此得名。官至祠部副郎。知秀  
州。所著有東堂集。

魯虔州伯能

魯伯能。安吉人。博學強記。九歲通五經。日讀萬言。家貧  
無油。夜乘月光誦讀。達旦。歷官虔州太守。生平無他嗜  
好。唯以文翰自娛。有文集三百餘卷。

林國材幹

林幹。字國材。樂清人。崇寧初。士皆以舍法論秀登名。幹  
獨不事舉業。屏跡田里。閉門著書。居木榴山。因號木榴  
子。著淵通四十八篇。以做老子道德經著單思十三篇。



以倣楊子法言。邑令鮑輝得其書而讀之，歎曰：「理義精微，非後學所能測其涯涘。」程守邁翫撰時政以進，幹爲進策五十篇，藁成而卒。所著書多散逸，不傳學者惜之。  
洪州錄參萬先之庚

萬庚字先之，樂清人。善詞賦，太學興，首中優選，紹聖甲戌上舍釋褐，授縉雲尉，調全州教授，清湘士子稀少，初至郡，丐增廩給以養士，郡將異其才，俾兼攝幕職爲文，雄深雅健，追步韓柳。湖南諸郡碑碣不得庚文，不以登石，秩滿改洪州錄參，虞允文入相，王十朋自泉南貽書薦之，謂庚爲上舍第一，今太學上游多在館閣，而獨庚汨沒，乞加識擢以獎恬退。虞得書議除學官，未上卒。

新喻尉喻季直良弼

喻良能何恪陳炳附

喻良弼字季直，義烏人。與兄良能叔奇俱以古文辭有聲太學，良能成進士，而良弼僅以特科尉新喻，有杉堂集十卷，樂府五卷，龍川陳亮曰：「烏傷四君子，叔奇與人煦煦，有恩能使人別去，三日念之不釋，其爲文精深簡雅，讀之愈久而意若新。季直遇人無親疎貴賤，皆與之盡，其文蔚茂馳騁，蓋將包羅衆體而一字不苟，讀之疊



臺而無厭也。四君子尤工於詩。其二則何恪。茂恭。陳炳  
德。先也。四人之中。良能最知名。一時鉅公。若洪內翰。邁  
陸待制。萬里諸名公。皆與爲文字交。其文辭。其  
何恪。字茂恭。博雅好古。工文辭。藏書至萬餘卷。以進士  
主永新簿。再調徽州錄事參軍。未赴。詣闕上萬言書。進  
恢復二十策。與朝論不合。歸。所著有南湖集二十卷。  
陳炳。字德先。才氣卓犖。面目嚴冷。與人寡合。好古文務  
爲奇語。登進士第。爲太平縣主簿。陳龍川曰。德先舉。二  
世不足以當其意。而人亦不願從之。遊然其文清新勁  
麗。要不可少。所著有易解五卷。巖堂雜稿二十卷。

### 潘雄飛翼

潘翼。字雄飛。青田人。建炎末。徙居樂清。貫穿諸子百家  
之書。凡禮樂制度。與夫傳註箋疏雜說。靡不淹通。明天  
文作星圖。證驗休祥。畢應。又著九域賦。凡山川州里遠  
近。與嘗親歷者。言無少異。括隱僻字。補註韻篇。遺漏辨  
爾雅本草名物訓釋。舛誤尤工。古文記問。橫臆動輒。數  
千言。邑之聞人。登科者。多出其門。詹事王十朋。少從之  
游。每歎不能竟其學。後二十年。將編次其文。刊諸泉南。



會召不果，今多散逸，不傳，為可惜焉。

中書舍人范元卿端臣

范端臣字元卿，蘭谿人。賢良浚之從子也。受學於浚，以宏博稱。紹興中登進士，累官至中書舍人、右史。雖入官，未嘗廢學。文詞典雅，尤工於詩。有集三卷，出入風騷，卓然名世。學者稱為蒙齋先生。

集英殿修撰何德輔

何輔字德輔，龍泉人。博學工文，以進士教授紹興時。方與金和好，輔哀少康、周宣王、漢光武、晉元帝事，可施行者，為中興龜鑑，上之。乾道間，以集英殿修撰出知廬州。上賜詩祖餞，有奏議內外制、西漢補遺、大學講義若干卷，藏於家。

樞密院編修官姚令威寬

姚寬字令威，嵯人。舜明之次子也。由江東安撫累遷樞密編修官。博學強記，尤精天文。完顏亮入寇，虜衆百萬，人為震慄。寬抗論歲星入翼，虜亡之兆。未幾，亮果斃。後人奏疾作，仆榻前卒。上為官其一子。所著有西溪集十卷、註司馬遷史記一百三十卷、補註戰國策三十一卷。



五行秘記一卷及玉璽等書又擬樂府數篇俱超越漢魏云

滕元秀岑

滕岑字元秀桐廬人紹興名士平生苦吟與陳埴相倡和其佳處自謂高視大曆十才子所作詩凡三千首趙汝愚知郡日借其稿竟掩不還故傳者絕少

林進士伯仁越

林越字伯仁父通自龍泉徙家青田之沙阜而生越登紹興二十一年進士監行在諸司審計平生學力深於

漢史撮其文附以訓詁凡五十篇名曰漢雋一夕感夢上帝召署仙官無疾而逝

南陵尉蔣朝式則

蔣則字朝式縉雲人舉進士第調尉南陵適歲大侵則諭巨室出米數十萬石減直賑糶惠及當塗池陽之境修復廢陂溉田數萬頃則詩體平淡深得盛唐人志趣佳句多落人口嘗試百雁圖姜特立指爲雞群野雀

進士王子潤壁

王壁字子潤鄞人生而穎異七歲日誦千言一過輒不



忘弱冠登進士第。年少氣銳，以遠大自期。悉焚前所爲舉子文，披閱羣書，蘊畜日富。舉筆爲文，波瀾洶湧。朝廷方復博學宏辭科，首冠其選。未及授官而卒。士論痛惜之。

### 江東提刑王順伯厚之

王厚之字順伯，諸暨人。乾道二年進士，歷淮西運判。每言事忠懇，溢出。改江東提刑，進寶謨閣，致仕。平生好古博物，尤注意金石刻文。所著有金石錄三十卷，考異四卷，考古印章四卷，題跋周宣王石鼓文後考訂秦惠王詛楚文精鑒絕識，刻畫深淺，賡辨無遺。識者賞其博雅。

### 太府卿王清叔卿月

王卿月字清叔，臨海人。博學工古文，辭不隨時，好力還古雅。登乾道五年，鄭僑榜進士第，歷官太府寺丞、假吏部尚書，克金國生辰使，未行。進太府卿，卒。終朝散大夫。卿月嘗樞中書舍人，直學士院，掌制誥，所草詞百餘篇。不避嫌，不修怨，不飾美，以市恩，不畏勢，以屈筆，深得代言之體。嘗草胡銓制云：吾寧身蹈東海，獨仲連不肯帝。秦至今名重泰山，微相如何以彊趙。時論重之，自稱醒。



庵居士所著有醒庵集

衡陽簿薛持志寘

薛寘字持志昌國人少有文名及長以聖人執權賦領鄉薦調衡陽簿時史彌堅帥湖南一日寇起黑風洞檄寘往撫諭將至有道其姓名者其首曰非四明作聖人執權賦之薛寘邪遂投戈而退

朝奉大夫華安仁鎮

子初平附

華鎮字安仁會稽人登進士官至朝奉大夫鎮博古工詩文名冠一時嘗輯會稽覽古詩幾百餘篇最稱精覈子初平亦登進士爲太常博士討論典故據經攷索初無阿附靖康初爭金人尊號貽怒當塗及二聖北狩竟憂憤卒

知臨安鞏仲至豐

鞏豐字仲至武義人學敏而蚤成自童卅時前輩源緒古今音節事之因革總統固已多所該習宿艾駭服以爲積數十年燈火勤力聚數十家師友講明猶不能到淳熙中以太學上舍擢進士第累官知臨安縣改提轄左庫藏卒所著有東平集二十七卷文無險恠華巧而



以理屈人。片詞半簡。皆清朗得言外趣。尤工爲詩。多至三千餘首。

### 隆興教授陳彥羣季雅

陳季雅字彥羣永嘉人。質靈氣邁。隨聞而思。遇見能述。自高其才。不樂師授。與人論無所降。人亦未之然也。異日州將薦季雅高等。讀其書。適熟如素。搆徃徃加以新意。出人上。始大歎駭。中淳熙進士第。授隆興府教授。改漳州。未上。益閉門。盡抽古今文字。且誦且索。務爲周覽。編索鈎得其要。年四十五卒。所著有兩漢博議等書。

### 守興化軍樓叔暘昉

弟昉附

樓昉字叔暘。郵人。登紹熙進士。與弟昉俱以文名。少從呂成公游。其文汪洋浩博。凡所論議。援引敘說。小能使之大。而統宗據要。風止水靜。泊然不能窺其涘。從學者常數十百人。最顯者鄭清之。應繇。鄭次申。趙與權。尤善章表。李璧。黃裳。爲侍從。所爲文。俱出昉手。守興化軍。以疾卒。清之旣相。追贈直龍圖閣。率其弟子祭於墓。

### 閣門舍人潘德久榿

父文虎附

潘榿字德久。永嘉人。父文虎。右科第一。榿以父任補右



職繼參戎幕召試爲閣門舍人久之授福建兵馬鈐轄卒平生喜爲詩下筆立成聲名籍甚人莫能儔永嘉言唐詩自柳始有轉庵集若干卷

趙紫芝師秀 翁卷徐璣附

趙師秀字紫芝永嘉人登紹熙第浮沉州縣改秩而卒自乾淳以來漁洛之學方行諸老類以窮經相尚時或言志取足而止固不暇如昔人體驗聲病俾律呂相宣也至潘檉出始倡爲唐詩而師秀與徐照翁卷徐璣繹尋遺緒日鍛月鍊一字不苟下由是唐體盛行其詩清新圓美若野水多於地春山半是雲瀑近春風濕松多曉日青等句人傳誦之一

徐道輝照

徐照字道輝永嘉人工詩水心葉適銘其墓云有詩數百斷思尤奇皆橫出歛起冰懸雪跨使讀者變蹕慘慄首肯不自己又云發令人未悟之機回百年已廢之學使後復言唐詩自君始不亦詞人墨客之一快也其許之如此

著作郎劉安道澹然



劉澹然字安道松陽人博極羣書舉嘉泰壬戌進士歷  
官秘書省著作郎初安道之爲舉子也遊三衢試士以  
風雲龍虎之賦魁於衆作郡守史相竒其才而館穀之  
邑人項安世徙江陵其子容孫以浙東憲使行縣展墓  
安道以啓致之曰立春繡於霄漢之上孰不慕公子之  
威名耀畫錦於井落之間我但羨長卿之丰度又曰千  
萬世之人物山川盡收入吏部精神之表八十歲之鄉  
隣父老尚能誦平翁卍角之詩其俊逸之才如此著有  
午溪集

周會卿學古

子宗夷孫如堅附

周學古字會卿行已孫也兩薦漕闈卒不第遂息意場  
屋以風雅自娛水心葉適序之云周會卿與潘德久齊  
名德久漫浪江湖吟不擇地故所至有聲會卿常閉戶  
讀書盤摺生語有若天設德久甚畏之居謝池坊窟山  
宅水自成深致其子宗夷遺予家集零落十數紙感失  
怙早收次不多然一幹之蘭芳香出林豈紛然桃李能  
限斷哉宗夷名景略爲鄉善士孫如堅登丙辰右科終  
合浦令



國子助教陳繹魯

陳繹魯括蒼之龍丘人生而口吃喜讀書精敏異常諸經註疏多能成誦文辭汪洋浩博其氣燁如論者謂與莆田陳旅相伯仲官至國子助教

秘書少監俞兼善亨宗

俞亨宗字兼善山陰人隆興二年進士洪适帥越聞亨宗行義延至郡齋又偕至番陽與适弟樞密遵內翰邁游日以文章爲事後知漳州以勤幹稱嘉定初入爲秘書少監以老求奉祠章六上除直顯謨閣主管成都府玉局觀卒年八十九所著有文豪二十卷宏詞習業五卷山林思古錄十卷羣經感發十卷

北門學士盧申之祖臯

盧祖臯字申之永嘉人登慶元第歷館閣嘉定中以軍器少監與建人徐鳳並直北門屆時慶澤孔殷綸言沓布祖臯抒思泉涌號爲稱職當事方將處以不次俄卒於官工樂府意度清遠江浙間多歌之有蒲江集

翰林學士應之道繇

應繇字之道昌國人第嘉定十六年進士未第時袁越



公韶爲京尹，餘掌牋記，留門下。一夕坐有美堂，欣然若有得。同門客有最善樂府者，暮從外歸，問曰：「何欣然也？」以擬明堂詔書屬對甚善，答之。客哂曰：「一第脫飢寒，猶未能明堂詔何施焉？」餘後直內制，卒用所擬詔而客以樂府游公卿間，困躓以死。教授臨安，鄭丞相清之見其文，竒之。清之將拜相，俾草相麻，後卒用焉。餘以著作郎、兼學士院，樞直，端平開邊兵敗洛陽，餘與邊議，坐斥而清之亦罷相。居東湖，益與餘收拾文史，號建章集。皆制誥所需。清之再相，餘復用以禮部掌內制，遂力薦爲內相。理宗疑焉。一夕召餘入院，降詔草五制，夜四鼓進。人上始信之。翌日卽除翰林學士。後拜叅知政事，以疾告歸卒。

國子司業陳壽老者卿

陳耆卿字壽老，臨海人。嘉定七年進士官至國子司業。博學能文，遠叅洙泗，近探伊洛，周旋乎賈馬、韓柳、歐、蘇、曾之間，疆場甚寬而步武甚的。葉水心見之，驚詫起立，爲序其所作，以爲學游揚而文張晁也。至其獨得於古聖賢者，中夜授之，垂死囑焉，而曰：「吾向語呂伯恭，今以



語壽老四十年矣。水心既歿，壽老之文歸然爲一時所宗。所著有論孟紀蒙、貧窳集、赤城志行於世。

萬竹先生高端叔元之

高元之字端叔，郵人家。貧無書，得易編口誦不輟。數月忘盥櫛，隣士憐之，稍借之書。後受易春秋學於沙隨程迥。時傅伯成爲郡教授，少許可，折節與之交。錄是鄉學者數百人師事之。元之作變離騷九篇，曰：懸疇志曰：臣薄才，曰：惜來日日感迴波，曰：力勵曰：危衷曰：悲嬋娟，曰：古誦曰：釋思傳於人口。宋儒擬騷弗能及也。集春秋說

三百餘家號義宗，悉本經旨。凡百五十卷，易詩論語後漢曆志解各一卷，詩三千，雜著五百號，茶甘甲乙稿五。上禮部，卒不第。將死，手屬書樓鑰以歐陽公南省白欄求志文，貧不能葬，門人會葬於桃源鄉，立祠祀之，號萬竹先生。

趙叔午汝迂

趙汝迂字叔午，樂清人。族貴且蕃，兄弟羣從多掇高科，登顯仕。汝迂尤以能詩名，登嘉定第，駁駁進用矣。因夜雨梧桐，王子府春風楊柳相公橋之句，觸時相怒，謫官。



淪落不得志而卒。

### 神童柴蒙亨

柴蒙亨長臺人母徐娠夢神人遺大珠乃生蒙亨甫能言卽口授書日萬餘言過耳輒不忘六歲暗誦九經通春秋大旨郡將面試童科作文者三以神童聞得免解加賜帛益勵志力學端平二年初赴省嘗從幸六和寺上指示塔云一塔七層八面萬佛千燈蒙亨卽應聲曰孤舟雙槳片帆五湖四海上大嘉之卒於杭華而不實惜夫有詩集若干卷

### 趙幾道汝回

趙汝回字幾道永嘉人登嘉定第終主管進奏院名重一時苦吟興致高邁自成一家詠橘花云春風過後雪初白夜雨晴時水亦香詠水僊云屈原一點沉湘恨李白三生捉月身皆爲詩人所珍從其學者多知名

### 時天彝少章

時少章字天彝金華人天才絕出博極羣書談經多出新意而於史學尤精詩出入諸家由盛唐而上追漢魏文溯宋東都以前而逮古作者初由鄉貢入太學年六



十始登寶祐癸丑進士調麗水簿改教授婺州用薦者  
擢史館檢閱或忌其才高遂以凌躡劾之未上而罷改  
授寶寧軍節度掌書記奉祠卒所著有易詩書論孟大  
義六十卷論孟詩贊說易卦贊雜文古歌詩數千篇總  
之爲所性集

嚴州司戶趙澤民崇滋

趙崇滋字澤民永嘉人少穎悟博學負志卓犖早視一  
世登嘉定第調嚴州司戶尚氣不屈每與守諍守降意  
下之趙與篋長版曹檄和糴浙右辭不行人贊其清同  
年生多居要津不肯附麗以求速化工詩優入騷人闢  
域過荆沈哭崔悼步月諸篇膾炙江左善筆札得羲獻  
遺意每興到拂紙援毫頃刻成數千言曳金玉而走龍  
蛇觀者神駭以是名重一時

閩風先生舒舜侯嶽祥

舒嶽祥字舜侯寧海人寶祐進士官終承直郎年二十  
六時以文見吳荆溪荆溪稱其異稟靈識如漢賈誼終  
軍唐李觀李賀本朝王令邢居實輩後果以文學名奉  
化戴表元在元大德間稱東南大家其得於嶽祥者爲



多所著有史述漢石補史家錄蓀墅稿避地稿篆畦稿  
蝶軒稿梧竹里稿三史纂言談藜藜續藜殘藜傳藜肆  
昔遊錄深衣圖說凡二百二十卷學者稱爲閬風先生  
忠州判官趙季清善得

趙善得字季清永嘉人少以恩入仕繼登紹定進士第  
歷僊居丞忠州判官考舉及格未引見卒性穎悟文思  
泉湧下筆輒千言嘗云今人不解道古以胸次不如古  
豈惟不能道古亦未能鋪今蓋有四難意難濶聞難廣  
情難寫心難公又云作文如下黑白子有眼者勝又云

閱文如閱好山起伏多也子汝染孫崇栗俱登科

解元姚正子夢午

姚夢午字正子慈谿人生有異質七歲學小戴禮輒能  
言其領要邑大夫葉汝明面試中庸首章義及牧愛堂  
詩秋水出芙蓉賦皆援筆立就葉大驚異乃大書神童  
家三字以旌之九歲欲應鄉書一時豪雋以賈太傅期  
之不卽偶場之中都徧交當世知名士讀所未見書筆  
力益肆年三十六始發解未五十遽卒黃東發誄之曰  
正子起自童艸而長老先生折節相下起一介布衣而



當世知名士聞風願交不獲少槩見於世惜哉

戴復古式之

父東臯子附

戴式之字復古黃岩人其父東臯子以詩名式之承家學又嘗登陸放翁之門放翁與真西山稱其詩不下孟浩然所著有石屏集行於世

黃彥實叔英

黃叔英字彥實鄞人先大父文潔先生舉寶祐丙辰進士負材能尚氣節而尤邃於經術叔英能世其家而於經史百氏過目輒成誦爲文俊拔偉麗意氣奔放若不可禦而要其歸能弗畔於道有顛菴下筆三卷詩文雜著總二十卷藏於家

處州教授邵德芳桂子

邵桂子字德芳淳安人安仁簿吳攀龍子也鞠於所養因從其姓以博學宏詞登進士第教授處州弃官而歸鑿池構屋扁曰雪舟晚年慕天隨子之風家於松江之修竹鄉歿乃遷葬平生喜爲詩而意象冲融足淹高聽裁謝風塵之表脫超凡徑之外所謂卧深巖壑思遶滄洲瀟洒風流固宜爾也所著有雪舟脞談脞稿等書



編修林能一千之  
林千之字能一平陽人由右岸賜第再換文科歷官樞  
密院編修官知信州千之性穎異博洽今古工文辭深  
爲江萬里諸人所知迨元初徜徉里居以翰墨自娛家  
藏圖書法帖甚富鑒裁精審士林以好古博雅推之所  
著有雲根癡菴集

尹耕道起莘

尹起莘字耕道柘溪人隱居不仕學問該洽有感於古  
今治亂興亡之變因朱子資治通鑑綱目爲著發明五  
十卷大行於世魏了翁稱其深得文公之意云

薛叔容據

薛據字叔容平陽人性明敏有志於學弱冠文譽已彰  
諸老爭相延致嘗採諸子百家稗官緯紀之書輯孔子  
集語二十卷又撫古今輔相經略開濟之業粹爲宅揆  
成鑑一篇二書旣成中書舍人劉克莊秘書監謝子強  
見而愛之率同列進之朝略云藩垣置筆華滌不衰上  
可備乙夜之覽觀次可入崇文之藏貯其爲時賢賞激  
如此



翰林承旨趙子固孟堅

趙孟堅字子固海鹽人系出安定郡王初以父蔭入官後登進士第歷官集英殿修撰知嚴州遷翰林學士承旨孟堅修雅博識善筆札工詩文酷嗜書法多藏三代以來金石名跡又善作梅花水僊蘭竹於山水尤奇世皆珍之襟度瀟洒有六朝諸賢風致時比之米南宮晚徙居崇德年九十七卒謚文簡

孫因晉

孫因晉餘姚令統之後也隱居四明山逍遙鹿亭樊榭間博綜今古工文筆嘗採會稽遺事作越問以補王十朋風俗賦之缺騷林多傳之

知江寧莫光朝

莫光朝崇德人博學強記下筆數千言縱橫曲折無不盡文之致尤好爲詩力洗宋末庸劣之陋識者謂其得意處不在唐人下舉進士知江寧以撫字稱

元 共四十三人

學錄鄭德仲芳叔

子覺民附

鄭芳叔字德仲鄞人宋亡徧遊遺老之門博學廣記家



貧無書嘗假輿篇秘秩躬自繕錄積數十百卷爲文一  
根理要不事浮靡而縱橫曲折筆與心應從游常數十  
人兩司郡訓敦厚嚴重以道自尊而尤篤於人倫晚署  
學錄未上卒子覺民字以道積學累行不墮父名母嘗  
患日日以舌舐之卽愈後病癘衣不弛帶父當葬適病  
痞甚劇人止其臨壙泣曰幸從先人訖大事卽道死無  
憾返而差薦授龍游教諭三月卽弃去以疾卒有文集

三十三卷

于介翁石

于石字介翁蘭溪人貌古氣剛喜談諧以風流自命少  
從王宗庵業辭賦接聞諸老緒論其學多所通解自負  
甚高宋改物後隱居不仕一意於詩出入諸家豪宕激  
發氣骨蒼勁望而知其爲山林曠士也一時言詩者多  
引以爲不及有集若干卷金履祥嘗序之

淵穎先生吳立夫萊

吳萊字立夫浦江人。生而慧解。四歲口授孝經論語。及  
穀梁傳。應聲成誦。七歲能賦詩。族父幼敏家素多書。萊  
每私取讀之。幼敏從旁竊窺。乃班固漢書也。指谷永杜



鄴傳謂曰汝竊窺吾書能誦此當貸汝爵萊琅然誦之  
至終篇不遺一字幼敏三易他篇皆如初因盡出所有  
書使讀之方鳳時寓幼敏家歎曰明敏如此兒雖汝南  
應世叔不是過也悉以其學授焉自是該貫古今無所  
不考年未冠撰論倭千七百言論議俊爽識者謂有秦  
漢風延祐七年以春秋舉上禮部尋以所言不合於有  
司退居深畏山中益窮諸書與旨著尚書標說六卷春  
秋世變圖二卷春秋傳授圖一卷古職方錄八卷孟子  
弟子列傳二卷楚漢正聲二卷樂府類編一百卷唐集  
刪要三十卷文集六十卷萊尤喜論文嘗云作文如用  
兵兵法有正有奇正是法度要部伍分明奇是不爲法  
度所縛舉眼之頃千變萬化坐作進退擊刺其時俱起  
及其欲止什伍各還其隊元不曾亂聞者服之柳貫平  
生極慎許與每稱萊爲絕世之才黃潛晚年謂人曰萊  
之文蘄絕雄深類秦漢間人所作實非今世之士也吾  
縱操觚一世又安敢及之哉其爲前輩所推許如此以  
御史薦調長蘅書院山長未上卒年四十四君子惜之  
私謚曰淵穎先生



教授戴帥初表元 任士林附

戴表元字帥初奉化人七歲學古詩文多奇語稍長從里師習詞賦輒弃不肯爲咸淳中第進士調臨安教授行戶部掌故不就大德八年執政薦起家拜信州教授以疾辭初表元閔宋季文章氣萎薈而辭骯骯腐陋已甚慨然以振起斯文爲已任時四明王應麟天台舒嶽祥並以文學師表元皆從受業焉故其學博而肆其文清深雅潔化陳腐爲神奇蓄而始發間事摹畫而隅角不露施於人者多尤自秘重不妄許與至元大

德間東南以文章大家名者唯表元而已有剡源集行於世當表元時四明有任士林者亦以文章知名云

黃宏

黃宏黃岩人博覽羣經尤長於辭賦宋亡寄意於酒醉卽長吟不輟人有慕其名而造之者相對兀坐終日不得一語或以酒飲之不醉不已醉復長吟亦終不得其一語人皆以爲不可測至正初有以史才薦者宏笑而不就自是不復家居落魄江湖者幾三十年遂以客死文章流播四方有穀城集若干卷



侍講學士袁伯長楠

袁楠字伯長慶元人宋同知樞密詔之曾孫幼穎悟絕  
棄戲弄始從戴表元學績文脫去凡近長師王應麟授  
以文獻淵懿深有悟造尤長於論史悉究前朝典故叩  
之疊疊不倦嘗謂宋末文燿濫益自奮厲希古作者大  
德間用薦爲翰林檢閱擢應奉尋除待制詞義冠絕職  
內外制纂修累朝實錄多裨國論累遷至侍講學士恬  
退歸里自稱清容居士卒贈江浙行中書參知政事護  
軍陳郡公謚文清有文集五十卷刊於家

翰林待制柳道傳貫

柳貫字道傳浦江人幼有異質穎悟過人受經於金履  
祥學文於方鳳吳思齊謝翱自經史百氏兵刑律曆術  
數方技異教外書靡所不通作爲文章涵肆演迤春容  
舒徐人多傳誦之年三十一始用察舉爲江山縣學教  
諭改國子助教擢太常博士時方承平稽古禮文之事  
次第並舉遇有所規畫設施必俟貫論定泰定三年出  
提舉江西等處儒學多延名儒爲學者師士風大振已  
而召爲翰林待制兼國史院編修官到官僅七閱月以



文苑  
卷之四十六  
疾卒年七十三。館閣之士多至灑泣者。貫局度凝定。燕  
居默然端坐。嚴重若神。卽之如入春風中。人與之處未  
嘗見疾言遽色。雖有桀驁者。瞻其德容。莫不氣奪而意  
消。生平以獎進人材爲己任。人有一善。諄諄稱舉。唯恐  
不聞。天曆以來。與崇仁。虞集。豐城。揭傒斯。義烏。黃潛。齊  
名。天下高之。號曰四先生。善楷法。工篆籀。兼能鑒定古  
彝器。書畫。而別其真贋。所著有文集二十卷。別集二十  
卷。字系二卷。近思錄廣輯二卷。金石竹帛遺文若干卷。

翰林承旨趙子昂孟頫

夫人管氏子雍附

趙孟頫字子昂。吳興人。宋之宗室也。登進士第。爲潤州  
錄事參軍。國亡。家居絕意仕進。時時以文翰自娛。至元  
間。以薦入朝。世祖見其神采煥發。軒軒霞舉。心甚異之。  
卽拜兵部侍郎。日被寵眷。累官翰林學士承旨。卒。謚文  
敏。追封魏國公。孟頫博學多才。風流蘊藉。六經諸史。百  
家之書。無不該洽。搦筆爲詩。文千百言立就。不務雕幾。  
組織。而以春容平澹爲工。文追東都。詩在元和。長慶間。  
畫師顧陸。人物飛走。花草竹木。無不點染絕神。而尤精  
於山水。其高處不減王右丞。書摹漢魏。得力乃在大令。



學窠飛白種種皆妙至於蠅頭細楷大無半菽而結構有經丈之勢此其獨詣至今片楮隻字傳在人間者價重於珠玉真一代之才人桃林之傑士也夫人管氏亦善書畫尤工於寫竹風枝雨幹烟稍露葉無不逼真然能取態勢於筆墨之外所以爲妙子雍字仲穆詩文書畫俱不逮父而以文雅繼其前修亦可謂能子官至海州知州

翰林學士陳子經

祖著父泌附

陳經字子經奉化人官至翰林學士祖著宋秘書監知

州嘗本綱自著書以紀歷代之統父泌元饒州教授表章家學訓釋唯謹經自束髮受書卽思弘前人之業乃敷筆記二百卷又上論盤古逮於高辛會於有宋比事較義尊正統以定大分其紀年師司馬公補遺其書法師朱文公綱目名曰通鑑續編行於世

儒學提舉白廷玉

白珽字廷玉錢塘人博綜經史詩文一主於理紫陽方回劉辰翁稱其詩謝陶韋書逼顏柳仕至江浙儒學副提舉所著有湛困集



金叔肖似孫

金似孫字叔肖金華人少雋敏強記工舉子業文科既廢遂一意於詩清新警拔有思致善諷切人然性傲俗寡交好使酒多與人忤既鬱無所施益縱於酒家遂旁落感激悲憤一發於詩歌吳師道稱其負才不屑於俗殆古之所謂狷者其詩觸事感時亦足以附於風人之列云

陳景傳堯道

父希聲弟舜道附

陳堯道字景傳義烏人父希聲以文學爲後進師堯道好學不羈浮游物表以能詩聲黃潛稱其詩涵肆彬蔚如竒葩珍木洪纖高下雜植於名園終日玩之而不厭弟舜道朝出耕夜歸讀古人書薄已而厚物縉紳稱之

吳見心復

吳復字見心富春人少落拓不羈中歲折節讀書晚好游聞有名士不憚千里求見見聞益博善樂府歌詩高處逼盛唐與會稽張憲齊名所著有雲槎集十卷

徐秉國鈞

徐鈞字秉國蘭谿人宋汀州使君時升之子也以父任



文苑 卷之四  
為濠州定遠尉。宋亡不仕。家故多書。發其篋。盡讀之。至古今興亡之變。治亂之故。有槩於中。則發為詩歌。通計一千五百三十首。名曰史詠。許白雲黃晉卿為之序。

寧國司理楊仲弘載

楊載字仲弘。其先自浦城徙家錢塘。載少孤。事母孝。博涉羣書。年四十。以布衣召為國史院編修官。延祐二年。舉進士。為浮梁別駕。改寧國府推官。載為詩文。以氣為主。黃文獻公評其文。博而敏。直而不肆。尤以詩名。家人問作詩法。答曰。詩當取才於漢魏。取音節於唐人。多宗之。與虞集揭傒斯范梈並駕齊名。世稱虞楊范揭云。

傅景文野

傅野字景文。義烏人。博學工文辭。與劉應龜相繼。以詩鳴於時。黃潛嘗評其所作。精切整暇。如清江漫流。一碧千里。而魚龍百怪。隱見不常。

仇遠仁近遠

仇遠字仁近。錢塘人。元初為溧陽州儒學教授。工詩文。一時遊其門者。若張雨張翥莫維賢。皆有名。當時所著有山村集。批註唐百家詩選。



應彥文文虎

應文虎字彥文黃岩人家貧好學通易詩書三經尤長於詩。虞伯生楊仲弘見其梅魂詩極加歎賞稱爲應梅魂。黃潛卿陳衆仲嘗薦之不起。

翰林學士承旨張仲舉翥

張翥字仲舉其先晉寧人父爲吏官杭州鈔庫副使遂卜居錢塘翥遂爲錢塘人翥少負才雋豪放不羈好蹴踘喜音樂不以家業屑其意其父以爲憂翥一旦翻然改曰大人勿憂今請易業矣乃謝客閉門讀書晝夜不暫假受經學於李存得道德性命之說多所研究復從仇仁近學詩盡得其聲律之奧於是翥遂以詩文鳴於一時學者及門甚衆至元末以薦起家爲國子助教會修遼金宋三史授翰林國史院編修官歷遷侍讀兼祭酒翥勤於誘掖後進絕去崖岸不徒以師道自尊用是學者樂親炙之有質經義者必歷舉衆說爲之折衷論辯之際雜以談笑無不厭其所得而後已以翰林學士承旨致仕卒年八十二翥長於詩其近體長短句尤工文不如詩而每以文自負常語人曰吾於文已化矣蓋



吾未嘗構思特任意屬筆而已。它日翰林學士沙刺班示以所爲文，請易置數字，苦思者移時，終不就。沙刺班曰：先生於文，豈猶未化耶？何思之苦也？翥因相視大笑。蓋翥平日善諧謔，出談吐語，輒令人失笑。一座盡傾入其室，藹然春風中也。所爲詩文甚多，無子多散佚者，僅有樂府律詩各三卷。翥嘗集兵典以來死節死事之人爲書，曰忠義錄，識者韙之。

甌寧縣丞盛明叟

盛明叟，昌化人，以文學名。築蒙齋讀書，因以自號。工文

辭，所著有凍蠅說、雪賦、蕨薇子傳，爲士大夫所稱。仕終

甌寧縣丞

秘書監丞李季和孝光

李孝光，字季和，樂清人。少博學，篤志好古文。辭隱居雁蕩五峯之下，四方從遊者甚衆，聲譽日聞。泰不華以師事之。至正七年，詔徵隱士，以秘書監著作郎召見於宣文閣，進孝經圖說，順帝大悅，賜上尊。明年，陞文林郎，秘書監丞，卒於官。孝光以文章負名當世，其文一取法於古人，而不趨世尚，非先秦兩漢語不道。有文集二十卷。



雁山十記一卷行於世

葉景修森

葉森字景修錢塘人早從貞白先生吾子行遊古文歌詩咸有法則一時所與交者如王直人眉叟薛真人玄曦張外史伯雨張承旨仲舉唱酬極富所著有瓦缶鳴集膾炙人口

姚時和應鳳

姚應鳳字時和慈谿人自幼習家學卽以文字爲業頗自雄其才爲文喜馳騁每屬筆於廣衆中詞鋒橫逸一座皆驚後持以謁同郡袁楠楠告之曰子文不受束縛然法度自不可廢也應鳳領之自是務爲莊重簡嚴日益深邃至元間嘗就試省部時以龍虎臺命題有司得應鳳賦歎曰此楚漢故物也遂擢置高第今其詞猶爲世所傳誦有納軒稿若干卷藏於家

奎章閣博士柯敬仲九思

柯九思字敬仲僊居人官至奎章閣博士號丹丘生與虞伯生趙子昂爲友工於詩尤善画竹木以書法作之筆勢生動論者以爲文與可之後一人每得意輒題詩



其上，一時珍貴，稱為三絕。

馮士願

馮士願，富春人，贈集賢修撰驥之子也。少儻有大志，稍長，折節讀書，博雅能文章，作詩風格清俊。與吳見心、黃子久並負才名。

高則誠

高明字則誠，瑞安人，性聰明，自少以博學稱。嘗自言曰：人不明一經，取第雖博奚為？乃自奮讀春秋，識聖人筆削大義，屬文操筆立就。一時名公卿皆慕與交，登至正乙酉第，授處州錄事，歷轉江南行臺掾。所至政績赫然，稱神明，數忤當路，謝病去。除福建行省都事，道經慶元，方氏強留置幕下，力辭不從。又以禮延教子弟，亦不就。卧病而卒，有詩文行於世。

桐廬李文

李文，桐廬人，博學以能詩鳴。與楊鐵崖、宋潛溪相往返。夔夔子山深器之。元季多故，江浙行省，以便宜行事，檄為桐廬主簿，辭不就。遂與許立夫等游金華山中，飄然有物外之想，竟以詩文終。所著有近山集。



莫景行維賢

莫維賢字景行錢塘人好學能詩雅尚標致築別業於靈隱天竺間遶屋栽杏號曰杏園日與騷人墨客游咏其中列二十一題時人比之朝川所著有廣莫子稿赤城令楊庶夫維楨

楊維楨字庶夫諸暨人太定丁卯進士授天台尹罷去家居幾十年會修宋遼金三史維楨著正統辨千餘言歐陽玄讀之歎曰百年公論定於此矣將薦之爲忌者所阻尋用常格歷江西儒學提舉道梗不行張士誠據

浙西累使求致不能屈而撰五論及復書告以逆順成敗之說太祖在軍中時聞其辭張士誠聘甚高其義及登位召諸儒考集禮書迫於敦遣乃至京師時年八十餘矣作老客歸謚以見意上笑而遣之還松江卒維楨在娠母夢月中金錢墮懷而生稍長父器之粥廐馬爲資俾遊甬東得黃氏日抄歸學業日進平生性度夷曠喜戴華陽巾披羽衣與賓客周遊山水間以聲樂自隨有晉人風居鐵崖山下自號鐵崖先生好吹鐵笛亦號鐵笛子與人交無疑貳尤喜接引後生識不識稱



爲長者而惜不得大用。然亦以是得大肆其力於文辭。非先秦兩漢弗之學。久與俱化。縉紳先生與岩穴之士。投贄求文者。日無虛席。以致崖鑄野刻。布列東南。宋太史濂嘗有言曰。元之中世。有文章鉅公。起於浙河之間。曰鐵崖先生。聲光殷殷。摩曼霄漢。吳越諸生。多宗之。殆猶山之宗岱。河之走海。然也。撫其論撰。如覩商敦。周彝。雲雷成文。而寒芒橫逸。奪人目睛。其於詩。尤號名家。震蕩凌厲。如神施鬼設。不可察其端倪。其文中之雄乎。所著有四書一貫錄。五經鑰鍵。春秋透天關。禮經約。君子議。歷代史鉞。補正三史。緝目。富春人物志。麗則遺音。古樂府。上皇帝勅忠辭。及平鳴瓊臺洞庭雲間祈上諸集。通數百卷。

附鐵崖道人自傳

鐵崖道人者。會稽人。祖關西。出也。初號梅花道人。會稽有鐵崖山。其高百丈。上有萼綠梅花數百植。層樓出梅花。積書數萬卷。是道人所居也。泰定間。以春秋經學。擢進士第。仕赤城令。轉錢清海鹽。皆不信其素志。輒棄官。將妻子。遊天目山。放於宛陵。毘陵。聞雲中。



雲間山水最清遠，又自九龍山涉太湖，西沂大小雷之澤，訪縹緲七十二峯，東抵海，登小金山，脫烏巾冠，鐵葉冠，服褐毛寬博，手持笛一枝，自稱鐵笛道人。鐵笛得洞庭湖中，冶人族氏子嘗掘地得古莫耶，無所用，鎔爲鐵葉筒，之長二尺，有九寸，竅其九，進於道人。道人吹之，竅皆應律，音聲絕人世。江上老漁狎道人，時時唱清款，乃道人爲作迴波引和之，仍自歌曰：小江秋，大江秋，美人不來生遠愁。吹笛海西流，又歌曰：東飛烏，西飛烏，美人手弄雙明珠。九見烏生雛，城中貴富人，聞道人名，多載酒。道人所幸聞笛，道人爲一弄畢，便卧，遣客卽客，不去卧吹笛自如也。嘗對客云：笛有君山古弄，海可養蛟龍，可呼非釣天，大人不發也。晚年同年夫有以遺逸白于上，用玄纁，物色道人于五湖之間，道人終不一起。道人性疎豁，與人交無疑，二雖病凶危，坐不披衣，則弄札翰，或理音樂，素不善奕，画謂奕損閒心，回爲人役，見卽屏去。至名山川，必登高遐眺，想見古人風節，曠邁非常，人所能測也。與永嘉李孝光、茅山張伯雨、錫山倪鎮、昆陽顧瑛爲。



詩文友碧桃叟釋臻知歸叟釋現清容叟釋信為方  
 外友其文有驚世者有三史統論五千言太平綱目  
 二十策歷代史鉞二百卷詩有瓊臺曲洞庭雜吟五  
 十卷藏於鐵崖山云贊曰有美人兮號鐵冠冠鐵  
 葉之卷卷兮服兔褐之躑躑雷浦之濱兮鐵崖之巔  
 喻陰呼陽兮履坤戴乾萬竅不作兮全賴于天其漆  
 園之傲吏兮緱山之遊仙也耶

戴叔能良

戴良字叔能浦江人性警敏嗜讀書雖祁寒暑雨恒至

夜分乃寐自經史以及天文地理醫卜佛老之書靡不

詳究初業舉子尋弃去專為古學時柳貫黃潛吳萊皆

以文章鳴於浙水東良往來諸公門下盡得其間奧貫

卒良為經紀其家持心喪三年然後歸余闕持節過婺

聞良善詩歌與論古今作者詞旨優劣闕欣然曰士不

知詩久矣微子吾不敢相語乃盡授以平生所得於師

友者於是良之詩名遂雄視東南結屋縣西日與同志

討論聖賢微旨或與鄉之名賢寓公羽流釋子相與燕

集為樂酒酣賦詩擊節歌詠蕭然有塵外之趣至正丁



丑以薦擢江北等處儒學提舉時事不靖度無可行其志乃弃去遯跡四明山中益肆其力於詩文瑰奇磊落清新雅潔徃徃無媿於古作者洪武壬戌以禮幣徵至京召見試文稱旨欲官之以老病辭歸卒於家

孫以貞固

孫固字以貞嘉興人雅致恬澹讀書談道辟署華亭縣學事與楊鐵崖陶南村詩筒徃來唱酬成帙固嘗自題其齋曰聽雪著有聽雪齋稿孫植官尚書自有傳

諮議叅軍王元章冕

王冕字元章諸暨人年八歲時父命牧牛隴上竊入學舍聽諸生誦書聽已輒默記暮歸忘其牛父怒撻之已而復如初母曰兒癡如此曷不聽其所爲冕因去依僧寺以居夜潛出坐佛膝上執策映長明燈讀之琅琅達旦佛像多惺惡可怖冕小兒恬若不見安陽韓性聞而異之錄爲弟子學遂爲通儒性卒門人事冕如事性時冕父已歿卽迎母入越城就養久之母思還故里冕買白牛駕母車自被古冠服隨車後鄉里小兒競遮道訕笑冕亦笑著作郎李孝光數薦之當路欲署爲吏冕罵



曰吾有田可畊有書可讀肯朝夕抱案庭下備奴使哉  
每居小樓客至僮入報命之登乃登部使者行郡坐馬  
上求見拒之去去不百武冕倚樓長嘯使者聞之慚冕  
屢應進士舉不中歎曰此童子羞爲者吾可溺是哉竟  
弃去買舟下東吳渡大江入淮楚歷覽名山川或遇奇  
才俠客談古豪傑事卽呼酒共飲慷慨悲吟人斥爲狂  
北游大都館秘書泰不花家泰不花薦以館職冕曰公  
誠愚人哉不十年此中狐兔遊矣尚可言仕卽日將南  
轅會其友武林盧生死灤陽唯兩幼女一童留燕俛無

所依冕知之不遠千里走灤陽取生遺骨挈二女還生  
家冕旣歸越復大言天下將亂時海內無事或斥冕爲  
妄冕曰妄人非我誰當爲妄哉乃携妻孥隱於九里山  
種豆三畝粟倍之植梅千樹桃李居其半芋一區薤韭  
各百本引水爲池種魚千餘頭結茅廬三間自題爲梅  
花屋嘗做周禮著書一卷坐卧自隨秘不令人見更深  
人寂輒挑燈朗誦旣而撫卷曰吾未卽死持此以遇明  
主伊呂事業豈難致哉當風日佳時操觚賦詩千百言  
不休皆鵬騫海怒讀者毛髮爲聳人至不爲賓主禮清



言竟日不倦，食至輒食，亦不煩辭。謝善畫梅，不減楊補之。求者肩背相望，以繒幅短長爲得米之差。人譏之，冕曰：吾藉之以養口體，豈好爲人作畫師耶？未幾，汝穎兵起，一如冕言。高皇帝旣取婺州，遣胡大海攻紹興，屯兵九里，居人徬徨奔避。冕獨不動，兵執之，則曰：我能爲若帥出奇計，乃與俱見大海，告以攻城之策。高皇帝聞其人，召與語，頗合，置幕府，授咨議參軍。一夕病卒，冕狀貌魁偉，美鬚髯，磊落有大志，不得少試，以死。宋太史濂曰：予受學城南，時見孟宋言，越有狂生，當天大雪，赤脚上潛嶽峯，四顧大呼曰：遍天地間皆白玉，合成使人心膽澄澈，便欲僊去。及入城，戴大帽如篋，穿曳地袍，翩翩行兩袂，軒翥譁笑，溢市巾。予甚疑其人，訪識者問之，卽冕也。冕真恠民哉！馬不惡駕，不足以見其奇才，冕亦類是矣。

梁建中

梁建中，錢塘人。早嗜伊洛之學，復有志於文辭。下筆滔滔數百言，皆典雅溫厚，得聖賢修辭垂訓之義，絕不以聲牙佶偻爲奇。一時士大夫皆稱譽之。金華宋濂序其



文集。瀛門人稱建中刻苦好學，老而不倦，以比漢之袁公業云。

林愚齋靜

林靜，號愚齋，德清人。韶齒時，卽解綴篇什，研窮經史，百氏旁及，玄銓釋典，無不掇其芳潤。郡邑累辟不就，以詩文自娛。著有愚齋集，宋瀛爲之序。

沈元吉貞

沈貞，字元吉，長興人。甘貧力學，雖在試館，手不釋卷。宅傍有一井，冬夏源泉涌流，溉田數百畝。貞日往來吟咏其上，絕無仕進意。著茶山稿十一卷。

兩浙名賢錄卷之四十六終



文苑

卷之四十六

五

此卷之四十六終





書